

餅水齋詩集

一



集詩齋水鉗

(一)

著位舒

餅水齋詩集卷一

大興舒位著

元默攝提格

銅柱

日微煩郵吏。雲臺失畫工。關中遲鄧禹。牀下拜梁松。豈有三遺矢。曾經一挂弓。可憐銅馬式。何處烏呼龍。
突兀三千仞。摩挲五百年。將軍功略地。丞相樹參天。華表疑歸鶴。淫谿感視鳶。六州誰鑄錯。只有謗書傳。
崑崙關作

叩頭蟲

不到崑崙山。直上崑崙關。三更銅面具。一曲大刀鐔。絕壁飛諸將。華鎧耀百蠻。我時倘投筆。定可勒銘還。
叩頭蟲。無腰而折。無手而空。跂跂脈脈。何所求。剝剝啄啄。頻叩頭。獨不見斷頭將軍強項令。與蟲語。冰蟲弗聽。

斷腸花

斷腸花。碧於血。雙心一。株相歡悅。一夫兩心相決絕。妾是海棠根。郎是菖蒲節。斷腸花可食。斷腸之人不

可得。

相思子

埋得相思住。種出相思樹。千秋萬歲相思處。烟雲過眼。月入懷。琵琶一聲花亂開。爲君紅結相思胎。

催歸鳥

催歸催歸日未西。鴛鴦不獨宿。鷓鴣亦羣飛。遼西春夢黃鸝啼。碧紗如烟鳥欲棲。催歸鳥。歸家好。歸已遲。別太早。

柳州柳子厚祠

密雨驚風外。何人識柳州。竄身來絕域。失足誤清流。鳥下山城夕。花香水殿秋。潮陽祠屋近。無那故人愁。

東泉旅夜

逆旅東泉道。深宵景象殊。澗猿流月響。野虎負風趨。仰屋桄榔暗。循牆薜荔籠。青燈搖一豆。詩興強支吾。

鮚虎行

鬼門關前人似海。猛虎捉人如捉鬼。人鮚壺中虎難居。居民鮚虎如鮚魚。爲言前宵偃鬼來。悲風蕭蕭林木摧。山根舊有伏機弩。弩末不能穿虎股。不如左手提鐵叉。右手打銅鼓。虎聞鼓聲見叉影。竿尾箕睛怒而舞。是時虎意已無人。人亦不復目有虎。劃然一嘯當一叉。一叉虎口開血花。抽叉撻虎四山響。月破風腥一虎仰。雙杖椎鼓雨點塵。沈沈九地追虎魂。天明曳虎歸弗屋。不寢其皮食其肉。生吞活剝呼巨觥。白

酒黃梁一齊熟。我聞色變眉欲飛。是食人多毋乃肥。彼云食虎可避瘴。未下鹽豉敢相餉。搖頭謹謝阿羅漢。願君努力加餐飯。欣然就食甘如飴。風毛雨血忘朝饑。吁嗟乎。周處南山除一害。李廣北平官不拜。我如雞肋感曹公。爾自毚肩壯樊噲。歌成曠野良足豪。嚼過屠門亦稱快。慎勿消息傳入城。縣官來收虎皮稅。官來收稅尙猶可。吏食爾虎如食菜。爾有虎皮何處賣。

綠珠井

古井波瀾少。曾憐照影時。身亡顏色累。腸轉轆轤知。故里山雙角。高樓笛一枝。景陽宮在否。羞浣石欄脂。

桂林鷓鴣詞

相思嶺上石屏顏。啼鳥聲聲在樹間。苦勸行人行不得。行人已上萬重山。秋老西風入桂林。雨絲細細霧沈沈。蒼梧山近黃陵廟。啼殺湘花一片陰。斜陽紅樹曾相見。暮雨青林何處棲。只有鴛鴦不作客。一雙飛去浪如梯。

遊七星山棲霞洞

四山轉如圍。一洞鑿其空。跳出山外山。采入洞中洞。日月所不到。操炬以動衆。照見諸變相。鬼神恣搏弄。黑伏石萬尖。青瀉天半縫。蛇行曲竇細。狐聽冷泉潄。迤邐三里餘。人語聚一甕。徑絕通風雲。出險如出夢。但覺精魂搖。不惜腰腳痛。身輕霞可餐。胸羅星可種。來聞清猿嘯。歸與寒鴉共。老樹挂斜陽。前谿一僧送。

陡河

有山無水處。陡河作其間。三十有六陡。七十有二灣。灣灣各陡陡。不離馬頭山。山似攔水出。水竟尋山還。縈回青羅帶。宛轉碧玉環。築席聚涓滴。排石喧孱顏。扁舟逐波去。櫂唱聲間關。相傳鑿山骨。轉粟征南蠻。至今太平時。尙濟行李艱。乃知古有事。其利久未刪。不然桂海涸。踏破層烟鬟。

永州

一水如衣帶。風吹入永州。朝陽巖上日。遙見瀟湘樓。菴塏草書好。谿山小記幽。榜人間前路。未解意勾留。

活谿觀元次山三吾詩刻石

占得谿堂勝。蕭然獨往時。可憐循吏傳。猶是盛唐詩。飲酒都成例。磨厓亦有碑。先生能造字。比似買山奇。

衡山道中

歲晚蕭條倚短篷。相思迢遞冷芙蓉。山從九面帆邊轉。水到三閭廟下濃。宰相徵時徵故事。夫人仙去祕靈蹤。玉璫緘札看征鴈。方便飛回第幾峯。

昭陽單闕

岳陽樓

人間何處無城樓。惟有此樓傳岳州。二月八月湖裏水。南風北風天際舟。千年楚客誰憂樂。兩首唐詩自倡酬。卻上君山夢吹笛。數聲飛作洞庭秋。

江行雜詩

大地有時圻。長天無盡流。春風吹不斷。渺此一扁舟。日月摩雙鏡。乾坤禁百洲。阿誰能賦者。殘夢贈青鏤。一夜天花墜。蕭條散雪歌。長橋眠鐵鹿。澗浪踏銀鼉。龍水翻千偈。漁鎗畫一蓑。輸他驢子背。詩思鬱嵯峨。春色望長沙。江聲何處家。相邀玉鸚鵡。一唱銅琵琶。遠聚山如米。平開浪作花。英雄兒女淚。懷古蕩無涯。好景三春好。長江萬里長。連雲暗巴蜀。計日下荆襄。風急豚魚拜。天空野馬翔。身非衛叔寶。對此亦茫茫。

初發樊城

車輪轉處似羊腸。初試馱鈴道里長。新婦可憐三日閉。陳人同此百年忙。雞鳴膈膊開茆店。龍臥蕭條臘土岡。略記短長亭畔路。襄陽北去是南陽。漸看青草四邊生。稍喜紅泥一軌平。人面沾塵如敗鼓。客心薄暮抵懸旌。繩牀投宿鎧搖夢。蔥肆加餐餅噉名。二十四番彈指過。鳳城楊柳萬條橫。

邯鄲道上作

細雨濛濛薄埃。邯鄲道上杏花開。春愁宛轉隨車轍。古意蒼茫付酒杯。未熟黃粱唐小說。已埋青草趙叢臺。不嫌茆店知音少。曲項琵琶夜抱來。

題柳

一絲楊柳一梭鶯。費許天工織得成。已是春愁無片段。峭風猶作剪刀聲。

翠幔高樓定幾家。封侯夫婿隔龍沙。飛揚春夢三千里。直到天涯捉柳花。

太學石鼓歌用韓石鼓歌韻

周秦以來數法物。燕趙之客能悲歌。橋門左右庠上下。石鼓石鼓夫如何。惟嘉車攻采吉日。遂與禮樂消干戈。獵碣有十母。乃是如碑無字鏡。不磨三百五篇詩。彷彿一十八體書。爬羅比諸盤鼎功。則偉出自杵臼形。猶義吉甫作頌。蒐岐下。召公矢音媚。卷阿蒼姬忽。聚金石。訟黃犬。卻遣神鬼訶。儒生好古恨不見。既見又復疑其訛。包氈裹席汗牛馬。畫腹箝口訝斗蛸。桐魚大叩天地響。乃配辟雍逢逢鼙。尋原不同水濟水。考異何殊柯伐柯。已披雲霧看破鏡。況閱人代驚飛梭。朱門四扇開。諛蕩碧落三日行。委蛇颯颯大風紀。太史娟娟缺月愁。姮娥憶周東。遷宋南渡。此鼓來往經滹沱。黉宮三徙遠皇慶。良嶽一劫悲宣和。天心人事豈異任。武功文德應同科。石補五色良足貴。金填三品奚爲多。幸陪俎豆傍金馬。不隨荆棘埋銅駝。昌黎昔顧留太學。諸生習禮時相過。八代文衰慷慨。三都紙貴切以磋。鳳翔從政始寓目。又後百年嗟逝波。飛鳳當年自鬱律。續貂後士殊偏頗。後之視今。今視昔。安復屑屑論其他。誰辨琅邪氣。辟易欲尋岫。樓心嬾嬰。粵若稽古重太息。而後乃今三摩挲。興亡不聞史筆載。真僞卻探詩囊哦。或則言馬。或言鹿。或願爲鶴。或爲鵝。石鼓石鼓夫如何。非鼓非石愁無那。古法未遠自忠厚。碩果不食非轆轤。經天皇皇照日月。行地浩浩流江河。石不能言鼓乃壽。千秋萬歲毋蹉跎。

空谷

空谷佳人絕世姿。鳩媒一去苦相思。天寒修竹娟娟靜。翠袖蒼茫獨立時。
記得紅鐙待曉初。春痕深淺十眉圖。問渠小麝丁香印。銷盡宮螺五斗無。
東鄰卻扇夜催妝。豔絕金釵十二行。等是離鸞故鄉恨。輸他情願嫁王昌。
采采薜蘿山上山。天涯春夢大刀鐮。不知西海三青鳥。肯爲傳言玉女還。
三年風月夢行雲。腸斷金泥蛺蝶裙。一串明珠留不得。雙題紅淚寄還君。
秦箏促柱唱烏烏。大道朱樓酒易沽。別有空房三婦豔。不曾生小學常璩。
流黃明月漾秋深。錦字雲機一片心。織到天衣無縫處。些些鍼線本難尋。
鎮日青簾一桁垂。鴛鴦繡出下階遲。不須金線年年壓。自有春蠶五色絲。

雨後過法源寺

寥寥梵王宮。雨霽劇清美。潭影照素心。鐘聲落幽耳。雙屐不逢人。微鴉隔林起。

昭君詩

漢元帝時。陳湯斬郅支單于。傳首京師。呼韓邪單于聞之。且喜且懼。入朝願壻漢氏。遂以後宮良
家子王嬙配焉。漢書作嬙。通鑑作嬙。匪寇昏媾。與唐回紇有異。自石季倫王明君辭。已多謬詠。後
之作者。第弗深辨。惟元帝按圖召幸。致譏險謁。而嬙又自向掖庭令請行。不已銜乎。譬如李平馳
間道而始識真卿。毛遂喻囊錐而自媒趙勝。上不好瑟。下不愛鼎。士女之耽嗜可概矣。

永巷年年怨綺羅。長門夜夜定風波。可知千載琵琶語。絕勝三秋團扇歌。依舊錦車馳玉壘。分明鈿合隔銀河。蛾眉肯用黃金贖。妾被黃金誤已多。
天漢當年百戰助。安危誰料託紅裙。紫臺夢冷南宮漏。青冢魂招北塞雲。尙有牧羊蘇屬國。可憐射虎李將軍。由來一片關山月。拍遍胡笳不忍聞。
省識春風一面無。眞眞難向夜深呼。卷中人在崔娘老。馬上妝成蔡女孤。此去定騎紅尾鳳。再來豈有白頭烏。當時竟殺毛延壽。未盡明妃出塞圖。
雁門關外馬牛風。遠嫁烏孫事略同。但使古公能好色。不妨魏絳論和戎。掖庭請去恩非薄。山壑猶存句最工。回首平城三十萬。是誰奇計出無窮。

宋文丞相論語題文歌

丞相之文傳何時。作者眞僞未可知。其間不復加考辨。信以傳信疑傳疑。當年第一遶陽九。考官擊節稱其奇。詔書再起時事改。撫几散盡千金貨。上郡豪傑勳帝室。中年絲竹驅歌姬。一成一旅雖可用。三戰三北誰能支。中間不合大如礪。天荒地老兵馬司。狂人兵起太倉卒。從容就義請死之。浩蕩正氣歌。感歎臨終詩。與汝偕隱有遺恨。事君致身無媿辭。卽論文章已奇絕。況有忠孝相扶持。大都承旨技可惜。南朝降表辭尤卑。除非生祭與卻聘。不爾慟哭登西臺。乃知大節不可奪。日星河嶽常昭垂。張睢陽詩諸葛表。豈惟重其文辭爲。

雪後曉起有寄

昨夜西峯雪。蕭騷掩畫屏。便應揮玉麈。不惜倒銀瓶。鴉散樹微白。雞鳴山欲青。相思落梅曲。愁向笛中聽。

闕逢執徐

西山

城外青山屋後看。朝來爽氣破春寒。笙鐘萬谷酣風合。臺殿層霄霽雪殘。空際輭紅飛不到。吟邊積翠望無端。未容亂踏浮雲去。西北高樓正倚欄。

春晚宴集聞歌

歲歲春歸等逝波。金樽檀板奈情何。心驚李賀殘絃曲。腸斷桓伊清夜歌。隔嶺音書飛雁少。閉門風雨落花多。南鄰亦是消愁地。乘興還能許再過。

出南西門憩廣恩寺遂至豐臺卽事

出郭蒼茫塵事稀。春風一徑叩禪扉。橋橫流水客纔到。門掩落花僧未歸。初地鐘魚閒說法。故園鷗鷺靜忘機。幽尋不厭頻延佇。杳杳青林漏晚暉。依然楊柳倚風栽。短葉長條拂面來。送我馬蹄過蕭寺。隨他蝶影到豐臺。養花天氣紅簾卷。傍水人家綠鏡開。攜與青錢買春去。一枝斜插帽簷回。

殿春曲

紅雨霏霏拂畫簷。溼鶯啼處夢痕黏。曉來花氣濃於酒。不抱文珠便卷簾。
闌珊春事到豐臺。婪尾深深倒玉杯。日暮豐宜門外路。車如流水看花回。
門前一片賣花聲。紫韻紅腔別有情。盡日自隨蜂與蝶。不知春思爲誰生。
將開未開露漸稀。欲語不語春依依。粉奴舞袖一迴雪。不羨揚州金帶圍。
翦收絕豔有金刀。雲髻峩峩不厭高。一朵午痕紅膩處。只疑花把鬢鴉燒。

長椿寺九蓮菩薩畫像

妙蓮華下湧金輪。玉匣珠襦有化身。尊號已加皇太后。圓姿仍現國夫人。
閣中取傳徵文史。宮畔修齋託鬼神。彈指華嚴樓閣裏。膠山絹海一微塵。

小游仙詩

清淺蓬萊阿母家。春流一鏡漲桃花。無因風馬雲車路。歸向銀河借客查。
雲旗十丈晝初翻。六甲靈飛拜上元。閒殺閭風附書鶴。盡教玉女爲傳言。
曾入真靈位業圖。謫居猶得守天廚。如何一抹流霞影。醉倒河東項曼都。
碧落抽簪遠叩扉。粲然玉齒啓靈妃。含情欲說他生事。正好金籠放雪衣。
石壇花雨傍南城。狡獪丹砂太有情。一搯新人雙手爪。雪邊還要耿先生。

七寶清虛證上仙。秋風一樹倚嬋娟。費他斧鑿痕如許。纔到彎彎月子圓。
別館承霄卻贅秦。三聲橫玉破紅塵。分明烟霧乘鸞去。未信蕭郎是路人。
紫泥小海別經時。青綺疎窗忽見之。如此紅泉不能渡。十年春夢采華芝。

擬沈雲卿鐵馬金閨之作

楊柳西關笛。胭脂北苑妝。去時人易老。歸日路尤長。紅淚新婚別。黃沙古戰場。真成獨不見。猶作永相望。

五雜組

五雜組。織流黃。往復還。海燕翔。不得已。守空房。
五雜組。妓紅拂。往復還。虬髯客。不得已。扶餘國。
五雜組。霓裳舞。往復還。漁陽鼓。不得已。馬嵬土。
五雜組。文選熟。往復還。應科目。不得已。學干祿。
五雜組。蓬萊島。往復還。鹿盧蹻。不得已。食酸棗。

夜坐卽事用太白秋夕旅懷韻寄友

涼颼觸青蘋。萬里秋雲飛。尺素不可託。雁鴻將安歸。開簾滅燭影。流螢坐我衣。思蛩抱孤響。薄月邀斜輝。
豈無夙心儔。別遠良會稀。終須畢始願。黃塵深宵揮。

讀長恨傳三首用李義山碧城詩韻

誰將辱井比長干。無復飛橋奏廣寒。踏臂悔教來赤鳳。返魂何處覓青鸞。空餘宮女偷閒說。忍使天孫帶笑看。淒絕江南花落後。拋殘腰鼓共鈴盤。

玉體恩恩見小憐。六軍無暇請遊田。紫茵裏後難回首。紅藥開時記竝肩。客寄雙釵雲滿鬢。嬾留一轡月初弦。無因更問樓東笛。鐙暗長門背雨眠。地久天長有絕期。分明外傳淚雙垂。心驚忽更聽鸚鵡。齒痛誰能笑荔枝。生女生男空復感。爲雲爲雨豈堪思。年年宮殿江頭閉。付與新蒲細柳知。

待闕

待闕鴛鴦社有無。傳言鸚鵡事模糊。奪裘未必贏雙陸。側帽何須效獨孤。枉向磁硃求美玉。竟將慧苴抵明珠。只應桂海虞衡志。歸去書成范石湖。

旃蒙大荒落

盆梅一本無生態久矣今春始花悵然有作

梅花忽已開。芳此虛堂夕。幽人臥花冷。門巷無行跡。起眺銀蟾蜍。溶溶漾簾額。徘徊泛霞觴。清狂動吟魄。頗憶山寺僧。手種此標格。殷勤寄冷枝。谿頭雪初積。盛之綠花籃。圍以白綺石。香泥護其根。淺水承其澤。始言歲寒姿。久要竝松柏。胡然歎遲暮。飛翼暗狼藉。萋萋綠蒲晚。落落黃楊厄。榮衰殊不常。棄捐良可惜。

有如古詩人。蕭條在遷謫。又如古美人。淒涼怨離別。東風蕩園林。夢入藐姑射。鼻觀浮暗香。故枝訝嬌嬾。寒芳漸宜賞。疎蕊未堪摘。撫茲循環理。悄焉感疇昔。花開見有人。花謝送無客。等待鶴歸來。相將話清白。題畫

曾從山上采薜蘿。流水華年憶故夫。未信無情天不老。試垂霜鬢看麻姑。銑谷珠還不墮香。笛聲依舊按伊涼。何人記字紅樓底。偷寫徐妃半面妝。

感遇詩

咄咄復咄咄。百代如過客。壯夫輕黃金。君子重白璧。白璧苟有瑕。不如瓦與石。黃金能繞指。不如寸寸磔。所貴霜雪姿。蒼然見松柏。白鷺非純真。羽毛空自潔。卞和三獻玉。蘇季十上書。所持甯不貴。汲汲非其時。厚顏泣金盞。則足歎路歧。書玉旣已往。秦楚安可知。所以南陽畊。潛伏神龍姿。悠悠梁甫吟。三顧乃出師。終南有捷徑。猿鶴怨未休。坳堂覆杯水。蛟龍弗來遊。況此致身早。乃啓失足羞。冰山倏朝旭。得喪兩不酬。昔日東閣客。今日南冠囚。不見八司馬。直至蠻荒州。象齒旣自焚。豬肝亦多累。始爲蒼蠅笑。旋下黃犬淚。人生天地閒。翺若騁雲轡。水流不重波。花好無再墜。慎始名可成。知足願易遂。斯言書諸紳。庶以勸同類。

春雪歌

去年雪深不滿尺。十里五里無宿麥。今年風熟浮雲頽。三朝三暮猶徘徊。天遣飛瓊散花手。瀛洲玉塵十萬斗。玉田珠樹春無聲。益以靈霖賜南畝。酌我酒爲君歌。開門見雪喜則那。豐年之占洵有象。敝裘不覺春寒多。春寒沈沈遲漏箭。焚硯猶能誇白戰。但覺詩情出險奇。誰知天意矜愚賤。我聞齊梁之間穀食稀。連年苦旱草不肥。雨珠不得以爲粟。雨玉不得以爲衣。安得雪花片片大如席。能令四方萬國無寒飢。春雪歌。歌玉戲。願祝年年老農利。菽麥黍稷惟馨香。薦諸俎豆事上帝。

仇英桃花源圖

桃源洞。武陵谿。武陵谿口桃花隄。扁舟捕魚者誰子。忽逢桃花紅欲迷。再來不記桃源洞。漁人竟作桃花夢。桃花疑夢人疑仙。惟有武陵流水聲。潏潏君不見阿房宮中三月火。函關一丸不能鎖。火光迸入武陵谿。烘出桃花紅萬朵。秦人避火聞花香。漸入佳境非故鄉。外閒麋鹿內雞犬。一十七史龍元黃。當年劉阮天台去。人面桃花渺何處。太守何須更問津。仙人大抵無情人。無情有情轉愁疾。但見山深而林密。直教招隱作清談。且與鑿空傳綵筆。

題赤雅

百越茫茫感舊遊。誰傳風土記銀鈎。拋殘海上梅花瘴。搖落山中桂樹秋。天女雙鬟留客住。鬼門一髮使人愁。彈雲驟雪都無價。愛妾還能換馬不。屈宋衙官恨有餘。爲誰甘露下庭除。可憐當日三條燭。不要先生五體書。投筆從軍天外夢。抱琴招隱曲

中虛浪花歌後春烟老。身手猶能化蠹魚。

紅梅花詩

細雪霏霏冒院門。醉紅深淺早黃昏。經時翠羽飛無路。幾處朱樓夢有痕。春水欲迷桃葉渡。酒人空憶杏花邨。東風芳信年年負。更取坡公句子溫。東坡詩。年來芳信負紅梅。

柔兆敦牂

南西門楊柳枝詞

春城風雨路旁枝。郎馬青驄去幾時。放下珠簾三十里。一時楊柳盡成絲。家住章臺街上樓。三年消息板橋頭。東風相送閒桃杏。青眼看人不自由。塞北書成白雁稀。遼西夢斷黃鸝啼。不如吹作花如雪。得向天涯處處飛。九十春光尺五天。短簫聲唱柳屯田。今宵酒醒不歸去。殘月曉風何處眠。

城南

城南尺五接街西。御史臺臨宰相隄。鷗吻由來都好望。禿鷲從此不須啼。卽看紅日長安近。那傍連雲大夏棲。卻有當關晨報客。誤人消息自天題。

午日見人家戶側有縛艾作人形者題曰鍾進士戲爲之詠

南山白石老鬼家。一劍綠繡菖蒲花。三年之艾五日福。風聲鶴唳咸驅邪。爲誰蒿目但相視。猶有蓬心遠集此。襤褸觸熱到人家。小草出山成進士。

古鏡詞

冷月蒼蒼暈一規。未知肝膽況鬚眉。如何乾德年間物。惆悵銅官沒字碑。倚鳳盤龍舊夢孤。一言擬問鏡當初。水精簾下梳頭影。曾照佳人絕代無。菩提樹下一塵生。佳識芙蓉夢未成。正是郎君羞妾面。幸虧相對不分明。

陽臺謠

芙蓉十二高唐女。入夢微聞楚臣語。鈿牀繡枕夜相邀。雲者行行欲爲雨。別有深宮鎖細腰。加餐不敢暮還朝。朝朝暮暮長如此。抱月飄烟爲君死。

綠陰

雨定風和日漸遲。濃陰一院與支持。春歸萬紫千紅外。人憶迴黃轉綠期。竹色上簾皺作畫。茶烟吹鬢裊成絲。笙寒水皺誰料理。十四年前杜牧之。

夕陽

鉤簾人倚亞闌干。滿眼斜陽獨自看。愛惜無過陰一寸。消磨何止日三竿。漁蓑歸去波猶影。鴉陣塗來墨亦殘。莫近黃昏便惆悵。夜深還有水精盤。

南國

南國有蛾眉。窈窕善無妒。集裳芙蓉芳。紉佩秋蘭素。修名恐不立。內美紛自顧。誓將託君子。結根深且固。悠悠楚江濱。嫋嫋西風渡。泛泛木蘭舟。遲遲爲君故。黃昏以爲期。中道忽改路。木葉下洞庭。美人怨遲暮。書劍南詩集後

魏闕江湖夢未忘。白頭射虎意飛揚。他年家祭淒涼甚。又見中原作戰場。將軍西第頌誰傳。丞相南園記可憐。爭似江東楊轉運。一官一集自編年。小樓深巷賣花聲。七字春愁隔夜生。較可尙書詞絕妙。一晴一雨唱紅情。誰遣鴛鴦化杜鵑。傷心姑惡五禽言。重來欲唱釵頭鳳。夢雨瀟瀟沈氏園。

秋日詠物詩

試問河中鯉。書來第幾行。愁余何眇眇。對此亦茫茫。樓閣仍雙影。蒹葭又一方。乘查消息去。清淺夜相望。秋水。

蒼茫古今別。黃落短長條。金線拋三月。珠簾卷六朝。笛聲斷腸曲。人影銷魂橋。倘憶張思曼。風情爾許消。秋柳。

淒清聽不得。又是擣衣時。陌上黃鸝曲。閨中白紵詞。玉弓秋皎皎。銀箭夜遲遲。寄遠那能到。惟君夢裏知。秋蟻。

寂寂翠屏掩。亭亭紅燄開。鏡心斜映處。釵股緩挑來。雨急花應落。宵深草賸煤。情知十年事。孤負爲疑猜。
秋燈

廣遊仙詩

弱水三千里。蓬山一萬重。雲旗招未下。霞輦去相逢。塵待元鸞拂。書當青雀封。瑤臺高宴散。惟聽曉來鐘。
王母

靈業天潢貴。談諧野史聞。機絲虛夜月。河漢卷秋雲。此地查難借。他生路又分。祇應一片石。化作望夫君。
天孫

美人抱明鏡。七寶夜修成。臣里青琳字。儂家白玉京。散花過小劫。竊藥話長生。乍聽霓裳序。天風第一聲。
月姊

嫋嫋西風下。青鐙誦九歌。蒼梧人去後。綠竹至今多。湘水晴開鏡。君山遠畫螺。妝成愁眇眇。流恨滿雲和。
帝子

初月

初月纔如許。微茫共此心。照人當夜淺。送客到秋深。河漢流虛響。關山變遠陰。彎彎唱歌去。難向九州尋。
未必嬋娟子。真成懊惱歌。明弓能幾合。破鏡欲如何。奔豈通銀漢。修應借玉柯。十年鴻鵠鳥。好好託蘇摩。
珠樹層層暗。瓊池的的遙。一鉤橫碧落。三日憶紅翹。清夜拋團扇。美人吹洞簫。應知舞鸞匣。殘黛一時消。

節物他鄉換。音塵隔歲遲。風懷無左右。月魄有盈虧。樸渥春難好。方諸取未知。蕭條看不得。留待一輪時。

佛

美人只合住西方。往往逃禪作道場。百日清齋飢欲死。三生結習老難忘。浴當苦海身誰度。繡入情絲手亦香。乍出文殊女子定。花飛劍動拜空王。

仙

枕函催漏小游仙。瑤想瓊思覓洞天。王母西池環一水。麻姑東海見三田。求憑方士真癡絕。謫作詩人亦可憐。欲寫相思收鳳紙。海山風峭打虛船。

鬼

成佛生天定幾時。聞聲對影又何之。漫勞拍手從旁笑。最可寒心到夜遲。聽去妄言人下酒。破來險語我題詩。不知墮向泥犁者。可有驚才絕艷詞。

神

洛浦招魂枕可留。漢皋錄別佩曾投。他生雲雨荒臺夢。昨夜星辰別殿秋。暗裏金錢偷自卜。愁來玉笈祕難搜。義山本是傷心客。一賦明神恨未休。

三十六體

青粉牆邊翠漆屏。葳蕤深下吠厖稀。殘星不動池波淺。秋露無聲木葉肥。酒醒愛飲三角髻。燈涼遙射五

銖衣不愁晝鼓譙門急。繡被焚香緩緩歸。

和人詠物四首

空地重門作晝暝。瀟湘十尺倚風聽。迎來桃葉難呼渡。撲去楊花欲化萍。銀蒜不曾妨宿燕。玉叉何意溼流螢。玲瓏一曲無多路。要託微波叩洛靈。簾波

促席笙歌宴未回。燭奴遙夜替人催。消除別恨三杯酒。觸撥閒情一寸灰。望裏青烟猶弄影。去時紅淚已成堆。翻憐背解明璫夕。曾費金釵細翦來。燭淚

傾銀注玉酒鱗紅。妙幻青蓮舌本通。荷鍤難容千日醉。掉船已覺百分空。閨人翦向鐙前卜。詞客開憐筆底工。忽憶四明狂賀監。眼花落井太恩慙。酒花

私書歸夢渺天涯。別院琴絲苦憶家。不分夕熏收睡鴨。翻疑秋陣數飛鴉。鄂君被裏眠應早。荀令鑪邊篆欲斜。乞與情人題恨字。心香痕淺印桃花。香字

雪夜雜詩

秋老關山唱采薇。刀鏃無恙遠人歸。舊時楊柳芳菲盡。一朵瑤花繡鐵衣。絕塞丁零使節摧。誰傳鴻雁上林回。年年大嚼天山雪。不記銅盤露一杯。相思合在洛陽邨。烟火蕭條雪打門。容可橫陳三日臥。不知人世有奇溫。谿山雪月兩佳哉。柔艣蒼茫近夜來。興盡還家無限好。不須親見主人回。

儻將鶴氅等閒披。雙屐行吟冷最宜。似此神仙應不少。相望祇隔一層籬。
天女初聞一笑拈。楊花晴撲謝家簾。何因滴粉搓酥手。解唱華奴析析鹽。
對影聞聲走蠹魚。清寒相映一帷虛。如何天祿青藜杖。只助劉郎校祕書。
最憶襄陽孟浩然。夜窗松月未成眠。似渠忍凍禁寒去。不爲梅花亦可傳。
半夜開闌萬馬塵。蔡州門外陣雲高。歸來風大花如席。照見將軍錦戰袍。
破帽蒙頭策蹇行。霸橋流水悄無聲。人閒此境應愁絕。纔著詩人便有情。
掃來鸞尾試茶烟。難得佳人手自煎。一樣銷金春帳底。不曾消渴但酣眠。
園林清絕傍孤山。招隱詩成畫掩關。消受寒威應未了。花纔半樹鶴初還。
偶思白戰聚星堂。此亦平生古戰場。誰識邊兵四十萬。園林鐘鼓句尤強。
鼠嚙枯藤險韻填。西風吹轉釣魚船。忽聞米桶有人語。強似會稽朱百年。

讀三李二杜集竟歲暮祭之各題一首

萬里蕭條萬古愁。狂歌爛醉與勾留。時來自奏清平調。才盡空爲汗漫遊。
緩頰遂能逢郭令。揚眉何用識荊州。星精月魄關來去。如此神仙謫未休。太白

一賦高軒自有情。驚才絕艷少年行。傾囊別撰元和體。協律兼工樂府聲。
天上宮樓徵著作。人間場屋避難名。幽蘭啼露香蘭笑。長爪通眉肯再生。長吉

飄零蹤跡別離天。腸斷樊南甲乙編。作客悲歡聊寄託。依人恩怨忽牽連。官卑不挂中朝籍。詩好難禁後世傳。他日西崑酬倡集。祇教優孟誦當筵。義山

千秋一部盛唐詩。飯顆山頭戴笠時。八代起衰風雅變。百年多病別離遲。但從房相論交者。豈有嚴公欲殺之。西蜀烽烟南嶽水。果然得失寸心知。子美

司勛晚出具風裁。傷別傷春泥酒杯。作賦但能供蠹誦。占詩忽訝夢駒來。感恩事久私成黨。薄倖名羸豔費才。惆悵露桃花一樹。爲誰搖落爲誰開。牧之

餅水齋詩集卷二

疆圉協洽

古劍篇贈人

梭梭匣中劍。揮手落秋雪。窮市今酸辛。荒原昔鳴咽。不知三尺水。誰鑄六州鐵。殺氣開土花。中有古人血。贈君報恩子。錦帶壓寶玦。夜半忽有聲。雌雄雙決絕。毋乃飛將軍。翻身入虎穴。霍霍磨天風。慘澹橫白蜺。歸封狼居胥。燭髓血猶熱。功名在身前。未信寶刀折。請歌從軍行。酒酣可以別。

題蚊蝶圖

讀徧南華悔已遲。草熏花落惜芳時。新愁昌祐圖中見。舊事羅浮夢裏知。寄處有人傳綵筆。飛來合得傍瓊枝。何當繡箔春風卷。長定相逢是笛師。

爾清姊丈贈裘

鶴氅貂褸不趁身。年年短褐走風塵。未勞錦段遺爲詠。猶見綈袍戀此貧。夜永鎧聲容我坐。歲寒霜雪與渠親。縱教吹徧鄒陽律。肯貰春旗作酒人。

錄別

關山何蒼蒼。縣互勢無已。我行逼炎巖。中夜戒行李。酒所唱驪駒。拔劍可以起。何處江南情。烟水一千里。搖鞭計遠程。客至秋深矣。

我生本飄蕩。所得惟別離。惘惘可憐色。縣縣無絕期。今日樽酒熱。明日誰與持。努力期後會。甯知在幾時。浮雲冒六合。從此長相思。

西風吹短亭。楊柳一夜老。淒涼種樹書。攀折苦不早。長笛十六椽。聲情爲顛倒。春光怨玉關。但有歸家好。莽莽睇天涯。何處無芳草。

宿雨消層嵐。朝曦澹遙樹。鞭絲帽影中。一往無尋處。引領見紅塵。況瘁愁僕御。殷勤雙車輪。及此蕭晨去。應有山中人。慵眠夢清曙。

盧溝

臥聞車馬聲。已知遠行客。開門見西山。一笑東方白。言辭茆店鑿。詰朝理輕策。脾睨列女牆。參差度官驛。長橋橫濁流。秋氣上龍脊。蚣蝱何嶙峋。闌干闔文石。可憐一水間。袞袞暗塵積。天風忽以吹。不辨去來迹。相顧長征人。毋乃利名役。流波發桑乾。逝者誰能惜。

琉璃河

琉璃一曲石橋波。中酒攀條歲歲過。送盡行人還自去。道旁楊柳已無多。

樓桑村

想像空山舉翠華。永安宮殿莽天涯。飄零一去將軍樹。指點尋常百姓家。繞涿諸毛笑蠻觸。同曹三夢亦蟲沙。成都八百株何處。丞相祠堂有暮鴉。

雄縣弔周世宗

江陵卜後晉王頌。一代干戈駐此閒。殺氣猶屯契丹國。河流長繞瓦橋關。親從五月揮兵至。早見三州納款還。淒絕病龍臺上望。玉書金繳不能攀。

趙北口題柳

兩岸平田漾午潮。柳枝調唱十三橋。竭來亞字闌干裏。邀勒春光一萬條。思婦樓頭一笛風。關山蕩子恨難窮。世間何物禁離別。多在倡條冶葉中。覆盎門西萬柳堂。揮毫秋色滿衣裳。恩恩遣唱輕塵句。無那班雕送陸郎。

雞聲

客路三朝趙北行。天河一笑汝南傾。清談絕少窗間趣。起舞難忘枕上情。夜永草堂人未宿。秋淒茆店月鵬明。銅壺銀箭無消息。但聽雞聲是五更。

德州曉雨渡衛河

細雨東陵道。平明送客船。夢猶驢背上。秋在鴨頭前。黃帽催雙漿。青箱趁一鞭。何如鹿門隱。高詠孟公篇。

投宿

投宿若爲主。田家景物真。雨餘具雞黍。風起憶鱸膾。來往野情熟。炎涼天意親。更闌添半臂。初中薄寒人。

高唐州

白紵曾聞子夜歌。高唐人去隔秋河。中年絲竹知音少。下里風流讀曲多。燕趙酒徒狂似昔。陽臺神女夢應訛。殷勤半面琵琶語。銀甲根根奈爾何。

東阿城下作

建安人物不同時。行盡山阿覺路岐。封建已成桐葉戲。嫌疑難感豆萁詩。酒邊走馬思年少。波上驚鴻赴夢遲。惆悵十三行字裏。一生贏得是相思。漢祚茫茫等劫灰。西陵疑土亦成堆。如何天下三分業。不及君王八斗才。風雅祇餘賓客盛。奸雄還爲父兄哀。一般濁世佳公子。醺酒妖姬得幾回。

舊縣西楚霸王墓

風聲夜起將軍樹。四面山河圍不住。美人楚舞君楚歌。烏雕不逝烏江波。可憐當日鴻門會。地戶天關玉斗碎。五色誰占天子氣。一江已注英雄淚。故鄉雖好無時還。沐猴而冠殊等閒。卷土重來惜揮手。渡江再見良羞顏。穀城山前望行路。斷碣猶題楚王墓。是耶非耶邱壠平。荒煙蔓草愁人情。君不見驪山魂斷宮車出。泉下魚燈照枯骨。又不見漢家陵闕莽蕭蕭。西風落日臨甃號。紛紛蛇鹿同淒絕。匿魄收魂古離別。知誰士壘與王頭。雨打秋墳野花血。

項王墓下弔美人虞

亂山埋骨隔青春。曾對宮娥淚滿巾。昨日玉魚難耐葬。當年鐵騎憶橫陳。大江終古惟流水。香草前身是美人。誰遣龍門成謗史。不將彤管紀歌塵。

穀城山懷古

手出奇書圯上傳。英雄容易遇神仙。赤松子宅游千仞。倉海君椎直一錢。此地青山橫作黛。向來黃石化何年。旁人漫擬陰符術。論定秦時避世賢。

銅城驛店對雨與張尙之炯秀才夜話題壁張時將之揚州

一雨辭殘夏。淹留感歲時。鐙搖山館話。棹遠水鄉期。白鳥投林杳。青驪伏櫪悲。真成行不得。多謝鷓鴣詞。十日九逢雨。遠人行寂寥。經時泥滑滑。薄暮車遙遙。鐙火且須住。風塵亦漸消。自看魚蟹眼。清味出茶寮。擊筑誰求馬。吹簫憶放螢。柳從今夜短。山到隔江青。舊雨開樽待。涼風倚枕聽。起看雪色壁。眷眷記曾經。既至濟上易車而舟時。吏方捕民車以應官需。御者苦其役。乃以酒飲逆旅主人。醉棄車牽馬而宵遁焉。余固知之。而不以言。且爲詩以送之。并題主人之壁。

聞道星軺出使尊。後車還要萬雲屯。輓轡惆悵知難轉。夜半銜枚過縣門。人外秋原雨溼鞦。車輪四角渺天涯。重來馬齒應加長。難向青山覓敵帷。三馬斃其一。擁蓋洋洋事已殊。隻輪無反舍車徒。還家定有妻孥笑。若箇思量薦大夫。

執轡求富爾何人。我自扁舟問水濱。酒醒不知馬幾足。他年紅袖拂詩塵。

濟州道中七夕

洞簫遙裔叩紅舷。續得齊諧記一篇。月子彎彎秋有信。星辰落落夜無邊。別離不作可憐色。昏嫁真成未了緣。失笑南飛烏鵲尾。爲誰辛苦又今年。
通詞何處託微波。乞巧分明隔絳河。豈有牽牛笑妃子。祇應顧兔悔嫦娥。紅牆翦水船雙槳。白石支機錦一梭。莫怪青天如碧海。淚痕鉛瀉此中多。

守牖

夢覺忽俯馮夷宮。眼前雪浪翻秋風。黃河九折石八字。舳艫銜尾來其中。平生浪跡在湖海。意氣竊愛陳元龍。布帆如席不可卷。滄州笑傲開心胸。胡爲鬱鬱久居此。橫波一寸難相容。水處非舟陸非屋。三朝三暮溝西東。鯉魚飄揚豈不利。土牛突兀將毋同。一水盈盈隔三版。雙星應笑詩人窮。瓜皮之艇小於葉。推蓬夜臥如張弓。舵樓人靜月華白。浮橋互互橫長虹。

放牖

津吏伐鼓聲橐橐。舟下金門水飛落。紛如駿馬拂寶鞭。沛若巨魚縱大壑。回流卻聽稍公呼。高臥仍思估客樂。一宿金山會有期。千里江陵殊不惡。經時逼仄行路難。公無渡河愁寂寞。忽然一笑大江橫。自在中流垂六幕。乃知行止各有時。人厄天窮兩非虐。此行豈必爲香鱸。欲去無端彈別鶴。何處關門橫索錢。曲

景闌干水邊閣。怱怱回首謝麗官。風利居然不得泊。

渡河謁碧霞元君廟

枕水琳宮祀碧霞。靈旗風峭卷神鴉。萬方儀態真妃錄。四姓聲名太帝家。滄海橫流將進酒。黃河遠上待乘查。誰憐繫纜題詩客。南北茫茫未有涯。

淮安舟次逢故人入都者紀別口占

當年攀折柳陰濃。別後春殘樹幾重。聞道飛花入江海。綠萍靡靡又相逢。北轍南船兩路遙。鬢絲無恙酒痕消。漁燈不剪西窗雨。江岸玲瓏唱早潮。

淮上夜行

宵靜息萬慮。水宿方晏然。篙師夢相語。起棹烟中船。柔艣弄軋軋。素波流涓涓。推篷數淮樹。月落聞秋蟬。

禹王臺

秋風吹上禹王臺。桐柏胎簪萬馬來。太華誰當巨靈擘。河源不待使星回。全驅怪物煙波老。獨闢神功俎豆開。欲注圖經傳岳瀆。石鐘猶陋鄭元才。

淮陰釣臺懷古

魚龍寂寞釣臺低。一去王孫草自萋。難遣狂奴歸大澤。終令尙父出磻谿。兵銷後下烹功狗。蠶起宮中啄野雞。莫唱烟波釣徒曲。竹竿嫋嫋水東西。

白馬湖訪陳琳墓

四州飛檄拓風雲。能使司空破膽聞。時運蒼涼常作客。文章慷慨欲從軍。但逢袁紹非知己。直到溫岐始憶君。醉酒射陽湖畔路。秋詩愁唱鮑家墳。

高郵道中

樓臺燈火無邊夜。河漢衣裳別樣秋。紅藕香中人北至。青蘋聲末水東流。買來孤艇隨風泊。乞與疎簾待月鉤。三十六陂吹笛去。舟人指點古秦郵。

露筋祠

秋水初平碧一隄。女郎詩向壁間題。儂歌顏色蔣三妹。野史香烟杜十姨。夢斷爲雲羞故岫。愁來行路泣深閨。殷雷聲裏揚鈴暮。湖上蓮花開濁泥。

夜抵瓜洲

月落瓜步煙。兩岸潮初靜。孤舫暗中來。艣聲柔可聽。始憐露氣滋。未訝風力橫。流人唱水調。輟棹動清興。背船一鳥飛。汀渚赴遙暝。颼颼蘆荻間。沙田凡幾稜。誰報隔江鐘。人語三山醒。

渡江

鷓鴣自南飛。鴻雁自北翔。黃鵠之舉。一千里。翩然乘風窺大江。蓬萊弱水不可到。清風半帆剛一笑。東坡居士登絕頂。蘇門先生發長嘯。絕頂長嘯可奈何。妙高臺上浮雲多。賦命窮薄亦何有。但見魚龍出沒千

頃之洪波。是時落月滿揚子。依稀隱見金山寺。紅船忽送入江濱。此身已作江南人。

京口書寄尙之

江海青蒼處。飄然一葉舟。思君令人老。作客幾時休。潮暗西津渡。山橫北固樓。昨宵攜手地。鼓吹是揚州。畫壁旗亭杳。迴颿驛路分。溼螢隨雨散。涼雁逼秋聞。扇影淮南月。鐘聲海上雲。紅牋方便字。拈韻寄同羣。

楓橋

冷落迴塘欲暮時。峭帆嬌娜去何之。數行鴻雁書來少。一段風煙客到遲。關吏尙嫌愁未稅。榜人惟有夢相知。偶然漁火江楓地。記得寒山寺裏詩。

胥門懷古

市上簫聲太等閒。鴟夷不悔屬鏤殷。歌詞惆悵烏棲曲。霸氣消沈虎踞山。一自抉睛看敵入。幾忘傷指喪師還。不堪楊柳東門路。潮打空城碧玉環。

山塘與朱二秀才棠話舊

嶺外吾曾到。江東君始歸。十年人漸老。萬里事全非。及此同情話。誰能共息機。夜闌如夢寐。又唱鷓鴣飛。

寄題靈巖響屨廊

恩幸無端近玉鉤。鑿空消息易生愁。行歌宮井青梧老。讀曲谿山白紵秋。能著平生幾兩屐。忽回天地一扁舟。不知到底還成錯。別有蓮花映雉頭。

秋夜集松南草堂贈主人戴丈學坡竝和唐六稚川

看花情緒最宜秋。又續春來未了愁。但有主賓俱不俗。便無雞黍亦堪留。暮香籬落風吹樹。夜影籬櫺月上鉤。此是昔賢棲隱地。一涇清水繞塘流。宋推官陳舜俞故里。在清風涇。

年時不到松南屋。親串天涯夢未孤。烏帽沾塵幾城市。白衣搖鰓忽江湖。山中桂樹留逋客。洞口桃花認釣徒。好在君家采芝室。十年消息記曾無。

花裏人家水上籬。水聲花氣不相離。白駒永夕中心好。紫蟹深秋左手持。三客傳香清到骨。一時泥飲漏如卮。輸渠十六西園集。背立雲鬟有侍兒。

落落長松數點仙。蕉迷菊隱不知年。催租人去償詩債。載麴車過賜酒泉。蘿徑笛聲吹月坐。藤牀秋色借雲眠。微吟應有花神覺。寫向風幡當壁箋。

梅仙圖

東風澹蕩羅浮邨。玉鱗霏霏遷客魂。何處參橫與月落。翠袖天寒倚孤鶴。來從姑射歷九疑。前身與花無是非。夜喚花魂伴花骨。花影人身共明月。空山春寒深復深。霜媒雪友無人尋。回看桃李媚芳序。金光駐顏空沈吟。沈吟攘皓腕。宛轉削香肩。風飄紫霞佩。月映翠雲鈿。雲鈿霞佩千秋妙。小影分明箇人貌。含情不語坐花中。銀海迴瀾作濃笑。我向百花洲上行。看花誰復記花名。花開處處珠簾軸。花落年年玉笛聲。珠簾玉笛愁無數。神仙中人等閒度。鐵石心腸繞指柔。爲君重作梅花賦。

重九日作

駸駸六轡歲華遷。秋老江鄉又可憐。細雨獨聽楓葉外。嫩寒初試菊花前。紅鱗書斷微波隔。綠蟻樽空醉夢懸。欲插茱萸無伴侶。西風高會是何年。

鬪蟋蟀行

開月城。臨高臺。陣雲片片紅玫瑰。霹靂一聲玉龍舞。從天飛下將軍來。將軍來。奈何許。邯鄲之蝨口中語。背城借一慘不驕。雙翅梅花落香雨。君不見蝸牛之角觸與蠻。左攻右突無時還。又不見易水之濱蚌與鷸。銻啄肉不肯出。區區得失如雞蟲。成敗安足觀英雄。

沈石田做戴嵩牛圖

春林蒼蒼流薄煙。下有百丈清冷淵。田家風景得形似。柴門不正臨谿邊。牧人蓑笠唱歌去。花蹄得得長繩牽。不愁前邨暗風雨。夕陽欲落山嫣然。一牛徙倚出深樹。一牛綠趁晴莎眠。餘有一犢掉其尾。飲流乾草行平田。今年布穀勸東作。禾香稻熟稱豐年。爾牛來思耳溼溼。不須縣吏催租錢。風光如此自堪畫。郭椒丁櫟皆清妍。戴嵩之圖不可得。摹者神妙秋豪顛。松南居士久藏弄。出示索我題長篇。竭來形影歎馳逐。旋息北轍仍南船。風塵大道不暇給。青絲絡馬黃金鞭。人生纏鎖太可笑。騎牛騎馬誰者賢。何當置身畫中住。橫吹鐵笛驅烏犍。

南湖夜泛

涼颼纖層波。落月澹湖市。夷猶聞棹謳。推蓬夜深起。不見烟雨樓。濛濛烟雨裏。

烏鎮雨夜丁受五元采孝廉招食蟹作

商飈浙浙菰蘆摧。棹痕劃破雙谿來。款扉絮語日將夕。笛牀茶竈無纖埃。主人留客客竟住。激灑初釐蒲桃醅。盤餐草草鄙肉食。黃蘇白茹誠佳哉。就中一味最殊絕。琳琅紅背花藝堆。煙波釣徒爾何許。明鏡秋籬分湖隈。草泥郭索貯筠簾。攜歸侑酒黃金罍。蜚蜚蠅蠅不足數。莼絲鱸膾差堪陪。紅雲百辣滴珠醅。老饕染指涎流頰。憶昔與君走燕市。烏帽日壓黃塵灰。春明酒樓高百尺。青旗楊柳東風迴。酪漿太厚鐵腳小。反使飢腹如驅雷。豈知轉瞬渡江去。輕舸直指昭明臺。左螯右杯有如此。何必餐玉七十枚。蕭齋秋敝下繁漏。笑譚爾我俱無猜。須臾飲滿果鼠腹。玉山倒處非人推。杯盤狼藉悵錄別。片雲頭上詩仍催。秋江明月不可拾。惟聽鳴湍激雨聲喧歷。

遙夜

遙夜蕭然此泊舟。不成去住且勾留。鐘魚遠近湖邊寺。鐙火高低水上樓。歷盡炎涼人不見。聽殘鴻雁客應愁。無因飛作南塘鳥。四面紅窗起棹謳。

夜坐聞落葉

葉落應難認故叢。四山風雨酒瓢空。憑誰溝水東西去。流出人間一瓣紅。秋聲如此夢難成。遙夜涼蟬咽玉笙。略記年時春院晚。送人滋味落花聲。

井上梧桐有暮鴉。門前楊柳不飛花。不知碧樹紅泥閣。春色明年又幾家。

著雍涪灘

梅花水仙曲客有自吳門餉此二花來者因紀其事

春船一笑送花來。四百紅橋昨夜開。便喚礬梅是兄弟。故應桃李作輿臺。
翠羽飛還近酒家。朱陵玉笛渺天涯。參橫月落誰惆悵。瞥見閨門萼綠華。
鄂君繡被舟中夜。湘瑟神弦江上峰。腸斷蘇州女兒曲。明珠一串負情儂。
金任詢詩蘇州女兒嫩如水。種作寒花遇不羣。吟殘春恨杳難分。十年綺語三錢筆。書破雙鬟白練裙。

錢武肅王祠

領取湖山付子孫。霸才蕭灑拓金樽。錦衣誰賜將軍樹。鐵券仍開節度門。
警枕兩頭龍不睡。強弓一手浪無痕。分明香火因緣地。合有神叢解報恩。

青鎮梁昭明讀書臺懷古

我昔江都遊。欲登文選樓。烟莎月笛發浩唱。長江之水東西流。昨從雙谿來。仍尋讀書臺。
東宮三萬羽陵蠹。惟有石徑長林開。元瑜初降穎胄死。襄陽城中慶長子。雅耽文藝樂譚遊。
腰帶十圍善容止。後來陳隋擅詞藻。花月春江安足齒。蓬萊文章建安骨。五官八斗差堪擬。雕文小剗波粼粼。
酒酣化作芙蓉雲。昭王

南征乃不復。銅輦秋衾愁殺人。愁殺人。奈何許。高樓既已荒。層臺復爲宇。君不聞松篁夜夜吟風雨。還似維摩讀書處。

蔡文姬塞外圖

絕塞刀鏤夢。春風識畫圖。關前折楊柳。山上采薜蘿。隱隱千烽戍。蒼蒼萬里孤。胡笳凡幾拍。爛漫看諸雛。旁有二子。一吹笛。一熟睡。

淪落才應累。蕭條感易成。蛾眉如可贖。馬角不須生。豈抵錦車使。終憐破鏡情。風沙甌脫遠。惆悵寫傾城。雨夜唐氏南軒作寄別受五

東風已破雙谿春。玉梅花開清絕塵。我來信宿此花下。撲簾香雨初懷人。君家記在谿橋曲。遙夜微波何處綠。相從蕩桡叩花關。不惜當筵翦蘭燭。邇來歡會不可尋。望舒羲馭淒我心。聽鶯雙耳春樹晚。持螯左手秋堂深。我歌君聽愁不止。青泥一夜占楓子。明朝卻掉蜻蛉舟。淄淄寒雲壓春水。

中復堂雪夜用東坡北臺韻同稚川作

天花初散手纖纖。白戰曾傳號令嚴。疑陣破除惟有酒。偏師剗剗到無鹽。空山一曲風吹樹。老屋三弓月墮簷。莫訝酸寒成骨相。待搢雙袖試茶尖。杯纔浮蟻墨塗鴉。腸斷無端似轉車。深院圖成誤蕉葉。閒門夢好閉梅花。拈來險韻誰題壁。受盡寒威我憶家。明日谿頭掉船去。十分春色上魚叉。

舟行

舟行三十里。幽意與誰俱。歸去行行雁。飛來泛泛鳬。一年拋歲月。強半在江湖。之子渺難見。寒風吹舊株。眉生小印歌爲陳涇南秀才試作。印是青田凍石。鈿閣女子韓約素製。朱文眉生二字。涇南遊黃山時所得。

君不見秦淮美人怨芳草。夕陽勻染紅蘭棹。雲袖低揎出一枝。鴛鴦小篆安排早。梁姬壓腕百八珠。韓爲梁千秋妾。金刀切玉玉不如。芙蓉齋頭橫素練。香痕石罅胭脂濡。恩恩流水青山夢。陽羨書生彈別鳳。玉棺珠冢愁烟塵。三庭不佩青城人。祖瑩博物尤古嗜。徽循春衣愛游戲。花乳還從黃海收。沈香不共烏員瘞。可憐往事雪泥鴻。鈿閣眉樓空復空。人前道卻橫波字。春印纖纖一捻紅。

春夜聽雨偶成

會散靈山一笑期。諸天花雨已多時。春餘芳訊青鍾斷。夜半遙情白鶴知。歸去定愁泥滑滑。夢來應有鬢絲絲。若爲翦向西窗燭。細寫當年寄北詩。

楊柳和稚川韻

一去將軍樹。三年少婦橋。春波天際遠。朝雨笛中消。古道黃驄曲。空閨翠鳳翹。何因攀折苦。瘦到沈郎腰。題稚川失釵詩後

甲帳辛房錦繡圍。酒醒釵影渺依稀。四枝鬟重雲初溜。六曲屏深月尙輝。白燕歸時愁趙后。紺龍化去訝

唐妃挂冠正要重相見。香徑泥銷蝶飛。

河東妝鏡曲

紫珍一去神仙境。銅片摩挲綠香冷。應作當年如是觀。莫教照見蕭蕭影。細數華年青鏡開。垂虹亭下水東回。將隨一舸鷗夷去。不爲三秋鱸膾來。心知繡虎陳王系。青粉牆頭笑含睨。可憐南八是男兒。那識延年有女弟。香塵溷洞緹雲詞。天竺初牽宛轉絲。曾從秋水芙蓉舫。唱徧春風楊柳枝。此時妝匣都梁燒。去眉萼唇朱疲。屢照銀帶分明出魏宮。玉臺取次憐溫嶠。早聞仙姥好樓居。錦檻香臺接太虛。薄怒犀枰棋正劫。吹春螺碗酒猶餘。一朝梓樹黃羊見。破鏡飛天樂昌怨。花落江南紅豆卽。雨荒東澗青槐院。青槐紅豆奈情何。荷暗無光豈足磨。秋娘老去朱顏改。江令歸來白髮多。朝絲暮雪愁何處。檢與神方教景駐。恨殺揚州百鍊銅。當時一錯真難鑄。笑態啼痕春復秋。鸞吡鳳靡綠珠樓。碧仙瘞土三生恨。金背銘詩五字愁。青衫司馬傳觀徧。郎三雲通守拓鏡背徵詩。粉錫磨旗再相見。花影參差雪滿頭。苔痕斑駁雲生面。卻望章臺溼翠衣。沾泥柳絮思依依。鈿篋繡履不知處。了了月明孤鵲飛。

紙鳶篇

杏花深巷春泥消。粥香餠白聞吹簫。東風裊裊二十四。已有年少相招邀。雲皋煙隰春衫影。欲取長繩繫韶景。此時韶景安可知。低昂高下隨羣兒。兒呼拍手歡無極。仰面看天齊著力。鵬化去未可期。鶯燕飛來似相識。浮雲浩浩風棱棱。太虛一點高一層。初疑翩翩下黃鵠。又若搏擊呼蒼鷹。雕陵鳥鵲不得意。銀

潢日夕思迴騰。微燐纖繳豈知數。看爾白日能飛昇。飛昇畢竟難與說。隱隱紅燈夜深滅。銀竹生愁細雨多。青蘋復恐微颺絕。孤鴻何處怨飄零。病鶴誰家舞鸞鷺。別有風絃漢殿箏。宮商一線遙鳴咽。

雜諷五首呈唐慧翁先生

陽文不世出。敦治夸嫺美。登徒既好色。焉知疥且痔。勃屑聊可娛。蘭聖非所喜。寵極忘其瑕。照耀出鄰里。此時西家蠶。臨流浣紗起。

叢蘭媚巖阿。天致本綽約。惜此無人芳。紛紛自開落。名園競春卉。疎皋隕秋蕖。節物有榮敗。可恃惟寂寞。昧然者誰子。方當治錢鎛。

文麟來九真。威風奮四色。以之司晨昏。不敵雞犬力。憶當在郊輶。祥徵頌家國。驅使達所長。時乖效乃嗇。何如歸飛鴻。冥冥毋篡弋。

殘月不到地。孤雲不歸山。人生無根柢。飄忽安足閒。客有金光草。可以澤容顏。願言持贈我。飛颺絕塵寰。終疑類萍實。卻之掩松關。烈火雖燎原。不能焚遠愁。巨刃或摩天。不能劃長流。深意望隆古。浩歌凌齊州。悲歡變終始。我心淒以秋。寄聲同志侶。一曲彈箏篴。

書壯悔堂文集後

梁園賓客杳難追。一卷名山欲付誰。南部烟花歌伎扇。東林姓氏黨人碑。平原試望江淹恨。故國深知宋

玉悲公子世家文苑傳。斯人一出竟何爲。

花落

花落江邨晚。蕭條鶯燕羣。紅塵三月雨。綠漲一谿雲。人語恹恹別。儂歌緩緩聞。憑誰化雙蝶。飛上鬱金裙。

春夜樓上聽鄰人吹笛

細漏丁冬換夕香。玉梯凝絕月昏黃。無端一曲風吹近。我是聞歌桓野王。
紅椒青粉一層花。入破遙傳碧玉家。驚起畫梁雙燕子。數聲縹渺卽天涯。

井

欲汲寒漿去。青絲上下多。點鐙曾不到。瀉酒欲如何。桐葉秋牀影。桃華露瓦波。迢迢夜參半。腸斷井泥歌。
過葉大哲卿書齋不值因題其壁壁有古琴

鳩

柴扉小石林。迢遞掩春陰。乍蠟阮公屐。誰彈昭氏琴。不知門外水。何處最清深。薄暮月初上。思君空此心。

鷺

槭槭青林細雨殘。雄飛雌伏冷相看。此心終爲陰晴變。笑殺鷺鷥雙井欄。
玉梭珠串太丁甯。夢斷遼西未忍聽。一夜櫻桃簾外雨。阿誰收卻護花鈴。

燕

海山縹緲白雲低。來去忽忙苦憶泥。隔是年年巢幕上。雕梁何處有雙棲。

蝶
紅粉樓頭春已深。青陵臺畔杳難尋。花開花落關何事。只取東風一片心。

蜂
花糧露酒兩衙寬。贏得前身是蜜官。閒殺蜻蜓釣絲上。清風六翮飽猶難。

雪珠
雲陽先生撒龍去。玉鱗十萬齊趨扶。手挈天瓢恣飛灑。陰陽縱閉春模糊。潛泉黑蜨躍狡獪。浮波朱鼈占溝瀆。瑤娥縹緲掩明鏡。玉女綵縵披華裾。雕雷屑雲不得息。歎風欲霧形難圖。杏花微紅起宿燕。柳條慘綠驚栖鳥。繚繞千絲織平野。浩瀚萬頃流長湖。忽然瑤琤一片落虛白。青鐙四壁詩腸枯。始疑清聞碎鐵馬。又若繁漏催銅壺。不然蒲牢古利九乳吼。金紫五色空山呼。豈知三十六天玉盤裏。參差錯落大小驪龍珠。令我忽憶南畝之農夫。黃蓑綠笠紛耰鋤。平田漠漠播牟麥。崇墉櫛櫛思黍稌。叱牛窮巷勞牧豎。養蠶閭屋愁小姑。長晴不雨那可得。要使肢體沾泥塗。況復鴉鵲咒豐歲。蒼翠且欲輸宮租。東坡喜雨慢作記。申豐對雹良非誣。會須不鳴不破祥瑞符。卿烟菜露無時無。遲爾甘霖三日蒼生蘇。雪珠雪珠何爲乎。君不見雨珠不得以爲襦。

留別學坡姊丈

記得聽鶯處。松南舊草堂。典衣杜陵醉。吹屐阮孚忙。卽事尋芝室。懷人過薜塘。東風無意緒。歸路易蒼茫。
清水涇邊路。春來此重經。草心風上綠。花眼雨中青。雅集思樽月。幽棲感鬢星。他年見安道。殘雪剡川舲。
答懷稚川吳門竝訊石頭巷故居

錦囊詩憶閉門成。繡被香隨擊楫行。爨下孤桐猶未絕。匣中雙劍已先鳴。共知玉局彈碁事。莫辨銀牀瀉
酒聲。隱隱鄧侯山外路。笛梅零落喚愁生。
回首吳儂小住時。十年淪謫得歸遲。夕陽難問烏衣巷。暮雨惟聞白紵詞。蕭寺鐘殘山悄悄。橫塘舟泊水
差差。夢中更乞江淹筆。還恨抽離共此詩。

賦得落花橋留別王大松巖

掉船欲向南湖泊。一翦微波翠烟削。故人家住落花橋。不見花開見花落。花開自有時。花落安可知。傾脂
河上棹歌遠。二十四番吹鬢絲。怱怱攜上河梁手。況復人歸落花後。關塞風雲九日書。湖樓烟雨千條柳。
我吟蕩子曲。君結幽人廬。明年花發春橋上。橋下應來雙鯉魚。

寄書

曉起思清湘。眇眇愁予地。美人采芙蓉。感此遲暮意。吳楚已異鄉。燕趙復橫術。生男不成名。但有四方志。
浮雲在青山。行役應嗟季。三復孟郊詩。殷勤書欲寄。常恐風雨痕。損我平安字。矧乃多浮沈。十未得三四。
回頭語去鴻。中道毋捐棄。幾日過衡陽。拜爾高深誼。

陳涇南采珠圖詩

涇南嘗寫洛神爲采珠圖。余題百字令一闋。初無所指。既於金昌畫舫。見沈伎雲影。則宛然圖者也。乃顏其圖曰洛川幻影。頃出示索書。爲題二絕句於後。

種樹思前度。淩波得後身。春風不相識。愁殺弄珠人。
十三行裏尋。四百橋頭見。書破白練裙。舞卻青團扇。

茉莉詞

霧縠冰紈換夕妝。幾家簾影罨橫塘。分明玉燕釵頭見。花是江南第一香。

真娘墓詩

北雪南花太等閒。美人一去冷空山。誰知化作身千億。多在紅船六柱閒。
歌舞蕭涼怨不勝。危巒一角浪千層。若爲燒作鴛鴦瓦。黃土青山兩莫憑。
紫蘭香徑愁蘇小。青草荒原憶漢妃。等是千秋好顏色。烏啼花落溼人衣。

舟次別稚川

醉和狂歌醒便行。中流相送水無情。再遲一夕恩恩話。唱到陽關第四聲。
金昌門外好烟波。酒盡移船奈若何。隔是傷春復傷別。不應仍著柳絲多。

夜泊潯墅

燈火橫塘路。開船是別離。橋聲人散後。月色夜深時。飄泊惟愁水。蒼茫但詠詩。關門吹畫角。今夜恨來遲。

雨中望惠山

泛宅梁鴻谿。蒼烟弔孤艇。濛濛細雨來。山外落帆影。疎梵隔谿斜。歸漁亂箬簷。何須望夕陽。卽此清涼境。側聞第二泉。高瀉雲峰頂。安得趙州茶。禪寮味石鼎。晴山迎我來。雨山送我去。白雲本無心。來去上山路。感此淒客懷。行行望烟樹。百年惜浮生。一葦無長住。不如留茆菴。青山有佳處。招隱久寂寥。冷然遠風暮。

舟中題奚鐵生做黃大癡谿居秋靜圖卷

鎮日扁舟風雨殘。經時長路往來難。青山滿地無錢買。祇向奚岡畫裏看。

丹陽道中寄懷松南

鳴榔溯長流。落月一江白。稍覺微風來。吟蟬在深碧。吹我曉夢醒。懷君采芝宅。風景良不殊。坐使千里隔。衍漾思流年。依遲怨闌夕。前期去復來。後會今視昔。路長浮雲陰。筵晚明星惜。魂魄尙可銷。安論形與迹。蘭陵鬱金香。今夜誰主客。

風雨渡江

風雨下天來。飛帆一笑開。乍分山樹色。忽卷浪花堆。江水東流去。樓船百戰回。玉簫吹斷處。龍起妙高臺。去年渡江來。今年渡江去。江北望江南。行人渺何處。行人歸有期。江水流無住。我將問諸江。薄言逢彼怒。

玉鈎斜

埋香猶記鬢邊鴉。未抵青谿葬麗華。清夜西園來殿腳。錦帆南國卽天涯。十圍汴水餘殘柳。一畝雷塘有落花。便化春魂雙燕子。阿麼歸去已無家。

絕句

昨過蕪城風料峭。今來璧社雨霏微。幾羣沙鳥背船立。一箇釣人收網歸。

書四絃秋樂府後

送客茫茫月浸波。江州司馬恨如何。烏絲紅袖丁年集。檀板金樽子夜歌。漫向玉皇誇案吏。愁隨織女渡天河。當年哨遍無知己。此是潯陽春夢婆。

玉茗才華勝竹枝。一聲宛轉迴含思。未忘江岸玲瓏唱。又遣天涯淪落知。烏帽春塵三館夢。青衫秋淚四絃絲。恨無十五雙鬟手。彈到鐙涼月白時。

欲說

欲說愁鸚鵡。將歸託杜鵑。星辰猶昨夜。風月似三年。越客千絲網。齊州九點烟。曉寒誰解賦。多謝衍波牋。

官橋

向晚蕭條一雁風。遙天咄咄正書空。好山恰在浮雲外。野店多逢細雨中。夢入匡牀無上下。愁來歧路有西東。不知此地杯中物。曾照離顏幾箇紅。

七夕沂州逆旅戲作

靈媧補天天轉缺。精衛塞海海不竭。青天碧海橫庚庚。倒瀉銀潢萬堆雪。中有靈匹三千年。參媒氏灼索聘錢。兩點星辰一條水。欲語不語心茫然。如此風波不可渡。對影聞聲發遙妒。未必仙家好別離。復恐美人怨遲暮。玉皇夜開紅雲居。三十六天秋色虛。金符九道檄飛鵲。背毛腹囊來徐徐。長橋臥波知幾里。辛苦芻尼供驅使。雄虹雌蜺不敢窺。祇少紅欄排雁齒。天孫身披無縫衣。清風浪浪橋不飛。暫詣牽牛驪然笑。將子無怒秋爲期。汝南雞唱層藍曉。別淚浮波紅島鼻。梁清侍側悄無言。惟見河心秋月小。此時相別不相留。此際言愁始欲愁。人間一年仙一日。一日亦已成三秋。君不見人閒乞巧癡無數。那知天上相思苦。姮娥倚樹罵蓬蒙。玉母偷桃擲漢武。不如東海看塵揚。青廬四面圍紅牆。牽牛織女昏嫁畢。跨鳳驂鸞遊八方。

行經泰山有作

天雞夜啼日觀峯。橫開四面金芙蓉。短衣策蹇曉行客。傲然竟來瞻岱宗。一門南天南。一山東海東。上有三十六帝日與月。下有七十二泉雲而風。試登絕頂訪太一。千秋萬歲何者爲始終。茫茫兮秦漢鬱鬱者齊魯。已無六甲授死生。祇叱五丁鑿今古。亦惟見山樹青氍毹。山石白巉巖。山上之天高眈眈。山外之海淫潺潺。山中之禽獸裔裔或般般。紛吾不測其所有。興之所至思攀探。或言此境往還須十日。恨無捷徑如終南。我生好遊踰萬里。五嶽時從方寸起。青囊布韜不論錢。人閒昏嫁何時已。昏嫁何時已。山靈笑我

從此始。

暮抵商家林逆旅識余是去年客復來

馬首聽西風。遠此縣縣道。蒼然暮色來。暝樹受歸鳥。時將枚數圍。一宿此閒好。逆旅具盤飧。願言供客飽。與客似相識。客行想不少。我開心悠悠。此語令人老。試問故鄉人。還家誰最早。

阜城驛題壁

馬攬一路數柴門。小住分明欲斷魂。樂府衣裳秋白紵。旗亭燈火夜黃昏。消愁賴有杯中物。好事閒留壁上痕。他日重尋東道主。碧紗紅袖兩難論。

重過趙北口題柳

丁字紅欄壓畫橋。楊低柳合刻迴潮。經過短驛還長驛。不辨新條與舊條。葉落鐘鳴秋色遠。水流花謝鬢絲凋。玉關羌管金城鼓。未抵吟魂此際銷。

白溝河次壁閒韻

車塵渺渺隔天涯。襖被清秋叩酒家。曉夢淒涼迷蛺蝶。夜弦生澀譜琵琶。曲終那更尋紅錦。詩好誰能籠碧紗。遮莫宣城三十萬。河陽縣裏易栽花。

秋扇

江頭根葉好相催。水樣春愁艇子開。月影似傳宮女怨。風聲已送故人來。將隨破鏡雙飛去。記撲流螢一

笑迴付與王維畫秋色不成搖落且徘徊。

荆軻

機橋捧蛟龍。質子出險要。置酒華陽臺。募死翦秦暴。荆卿燕市來。說劍溷屠釣。本意藉手成。豈敢輕心掉。燕丹旣多疑。舞陽復年少。日盡竟登車。誰能待同調。明知事鮮終。送客白衣帽。琴女未撫弦。鄙人先改貌。匕首中銅柱。鹿盧飛玉鞘。區區尺寸心。卽此可以報。但聞淵明吟。未許勾踐笑。成敗與利鈍。古人所不料。自郢城騎驢。凡行二十三日。抵都戲成。

一曲驪駒一朵雲。東西歧路杳難分。秀才券紙書無字。令僕人材更少羣。老我元駒能入夢。看人白馬去從軍。五陵年少休相笑。如此詩囊肯贈君。

古懷人詩五首

已進西家施。更拜南林女。陰謀采黃葛。奇貨歌白紵。忽唱梧宮秋。遂禱松陵雨。美人畫屨空。壯士錦衣舞。種樹不種陰。結交難結心。臣胥東門夢。臣種南陽禽。麋鹿怨復怨。煙波深更深。且應偷碧玉。安用鑄黃金。

右越大夫蠶

夜發晉鄙符。詰朝肅車隊。侯嬴雖未從。朱亥可共載。祇此四十觔。已陋三千輩。當年過市中。今日出臥內。得士良足多。震主幸自愛。翩翩濁世姿。錄錄餘子態。三窟不可營。一杯聊復醉。恩恩近婦人。不進李園妹。右魏公子無忌。

少懷家國怨中運帷幄。籌千金結死客。萬戶封列侯。侯亦不可封。客亦不可結。誰明一片心。空掉三寸舌。迢迢鼎湖龍。啄啄未央雉。但聞烹薊通。未信封雍齒。分難久相保。請學長不死。安知夏黃公。非卽赤松子。

右漢留侯良

赤手旋乾坤。白髮縱聲色。諸將各有功。諸孫不相識。懷光誠虎狼。盧杞復鬼蜮。承嗣膝若干。朝恩口無極。兩河方用兵。百僚未稱職。老夫毫無爲。陛下恩不測。雖殊李衡山。猶勝顏魯國。嗚呼新舊書。如公豈易得。

右唐尙父子儀

樓船乘長風。百戰好身手。本意抵黃龍。庸知變蒼狗。側聞丞相瞋。能令將軍走。是謀非所能。此事莫須有。寧爲阮嗣宗。臧否絕於口。毋爲馬文淵。皮革裹其首。社稷望旌旗。湖山醉花柳。可憐城下盟。不薦雲中守。

右宋蘄王世忠

餅水齋詩集卷三

屠維作噩

唐花

今年纔過試燈風。已有花枝照眼紅。隔歲春愁行市上。當筵人影落杯中。開時蜂蝶來猶少。夜靜笙歌聽亦空。誰遣名園遲氣候。卻教羯鼓笑天公。

雪夜懷稚川

落屋兩頭月。掀簾四面風。詩城千騎疾。酒海一船空。室夢虛生白。街塵輭壓紅。坐愁春爛漫。幾處故人同。

獨遊龍泉寺尋杏花

看花不逢人。但逐流鶯去。一路春風香。遙知寺門處。紅牆圍周遭。隱約見幾樹。入寺禪枝深。老僧留客住。閒因證蒲團。清味理茶具。徙倚紅白間。蜂蝶不知數。蜂蝶爲花來。花爲蜂蝶誤。靜中春意鬧。暗裏天公怒。回首睇西郊。斜暉澹將暮。曠然別阿難。已忘來時路。

新燕

新燕誰能話舊愁。別時猶是去年秋。南閨錦字仍千里。東海烏衣更九洲。枳棘詎來鸞鳳宿。稻梁空作雁

鴻謀銜泥莫謾巢君屋。幾處珠簾放玉鉤。

典裘詩

點檢青箱記昨宵。易衣而出太蕭條。吾家舊物誰能遣。此地寒威尙未消。曾有鴛鴦雙翦落。何來楊柳一旗飄。輸他走馬蘭臺去。雪滿宮門夜賜貂。王恭鶴氅晏嬰裘。紫鳳天吳不記秋。羞澀忽成垂老別。輕肥虛憶少年游。蛾眉絕塞金誰贖。狐腋重關客未偷。比似春衣杜陵醉。兩般滋味一般愁。

別去分明抵故人。年時冷暖記來真。青山策蹇圍天曉。紅蠟鈔書耐漏頻。得句漸知衣帶緩。看花惟有帽簷新。爲誰中道恩情絕。拋卻長安十丈塵。紅袖青袍兩不知。淒涼質庫且題詩。直愁一入深如海。空計三年遠作期。鍼線跡銷無處覓。風塵緣盡有時離。些些紕繆酸寒甚。等到冰綃霧縠時。

四月初七日法源寺看花作

春殘紺宇屐聲來。要乞狂香泥酒杯。可惜今年風力淺。好花無數不曾開。曲徑斜垣復幾叢。卷簾一顧恨難通。春塵著眼先愁暗。未免看來似霧中。數聲清磬野僧飯。一院碧陰閒客題。日暮更無鶯燕至。盡情輸與亂鶉啼。

題畫牡丹絕句

賞花取次惜花殘。富貴神仙事渺漫。不及夢中傳彩筆。尙能留到子孫看。

豐臺行

豐宜門外車摩輪。紅塵作雨不溼人。烟輕風亞買花節。氤氲爲使芳爲鄰。誰何到處稱好事。要插烏帽鋪青茵。黃絲碧股紛在眼。濁醪清曲時錯陳。鈿轡珠玑日徵逐。愛看飛鳥銜香巾。豈知盈擔唱歌去。紅腔載入重城闌。張機欲加九錫寵。築欄未吝千流銀。銅瓶一夜水清淺。墜茵落溷難與論。花開花謝一時耳。靜念物理誰爲真。麗桃俗李二三月。斂梁齊媚晨粧新。此花晚出雖獨絕。已過九十陽之春。三十三品種有別。一百五日留無因。天公爛漫殊狡獪。美人遲暮良酸辛。安得揚州萬花會。盡酌婪尾沾吾脣。春來春去勿復道。相與起舞隨芳塵。

題張子善孝廉芍藥倡和詩後

南西門外卽豐臺。繡轂長衢殷晚雷。笑殺薰香蕭館客。題詩爭似看花回。九十春光一酒卮。吟情豔裔惱花枝。朱門日費中人賦。但買春愁不作詩。

鷓鴣畫扇

樓臺花月唱春寒。記取樽前行路難。拂影年逢王內史。聞名先惱鄭都官。湘人門巷當秋聽。越女衣裳恰畫看。欲寄南雲舊消息。多君懷袖有飛翰。

伯父倣唐子畏富春山圖一角命題

桐江詰曲好烟波。隱隱青山響櫂歌。纔展谿籐似相識。十年前向畫中過。
疎簾清簟夢初醒。下直凝香晝掩屏。比似六如三丈卷。未妨縮本寫蘭亭。

冷枚華清新浴圖

落妃池上烟波綠。阿環承幸驪山足。水邊已見麗人行。殿角仍歌照影曲。照影疑從鏡殿還。溫泉水膩弄潺湲。花開陳苑臨春閣。波繞吳王銷夏灣。相從追暑鑾輿度。鈿砌雕欄臺清露。內園初進助情花。別館惟栽銷恨樹。江妃辭去念奴陪。遲日熏風湯殿開。更無紅葉隨波去。早見黃裙逐水來。須臾起舞雙魚鏡。綠鬟倭墮紅綃靚。趙后仙裙自可留。洛妃塵轡應還勝。當時但詔洗凝脂。誰賜金錢更洗兒。樓中赤鳳來何日。水底黃虬化有時。從此華清水鳴咽。延秋門上烏鵲徹。忽看驪嶺縣前流。化作馬嵬坡下血。碧落黃泉夢有無。蘭湯第二冷宮鳧。千年禍水幾傾漢。一曲香谿竟沼吳。金門畫史冷枚自號。丹青選國子先生藏一卷。圖爲宋助教大樽所得。浴鳳塵揚碧海空。牽牛淚落銀河淺。

城西贈林海珊同年

鳳城楊柳綠於苔。認得門從是處開。忽笑此閒容我住。預愁他日別君回。文章過夏題無塔。裙屐愁秋築有臺。也抵出門西向笑。不施行馬苦相猜。

詠史二首

南征馬援收兵後。北伐劉琨上表初。禿髮何曾歸乞伏。虬髯早已襲扶餘。誰憐去國紀侯大。遂見登壇小

白余略勝山西曹妙達。但將歌曲換中書。
樓船兵氣夜飛揚。橫海風雲出戰場。河朔終歸唐土地。巴西初論漢文章。自圖高閣三公貌。誰守孤城七日糧。欲撰平淮金石字。捉刀先有段文昌。

五代十國讀史絕句三十首

係履歸來汗一身。朱三本是碭山民。全家作賊偷天下。忽有投杯捉賊人。
廣字編年已去唐。公符傳識

竟稱梁少師。自愛楊風子。上將可憐王鐵槍。

後梁

遂有雕窠獨眼龍。生兒亞子果英雄。那知別撰伶官傳。流水聲中一曲終。
妝具銀盆入晉陽。新磨銅鏡

本無光。卻除菩薩留生鐵。又向宮中看射狼。

後唐

割取燕雲十六州。火光飛上洛陽樓。鐵穿石爛恩恩甚。紅殺僧堂一樹榴。
更無十萬劍橫磨。可惜陽城

一棗廳。獨向封邱門外去。路旁紗帽已無多。

後晉

不事南朝不北朝。紀年改國兩無聊。洛陽焚牒緣何事。寒食難容麥飯澆。
二威不死一威生。草草恩恩

作此行。卻受虛名收實禍。四年兩世不分明。

後漢

劉子陂前戰血流。瓦橋關外路悠悠。黃旗裂後黃袍出了。卻梁唐晉漢周。
恩恩五代劫灰餘。割據紛綸

且未渠。直到世無長樂老。華陰居士正騎驢。

後周

江北楊花唱步虛。笛家三孔怨何如。恩恩不記廬州釣。東海青天一鯉魚。
十圍官燭淚猶紅。難抵金奴

馬廐中腸斷丹陽迎奉使。更無三十六英雄矣。

碧落宮開笑女牛。南朝天子例無愁。不知江上黃花水。肯向銀河一處流。

鴛鴦寺主幾時還。金屑燒槽

譜未刪。留得數峰青峭在。曲中猶唱念家山。南唐

玉女初開半面妝。難營三窟到金牀。可憐一段琉璃下。祇有繒山阜莢香。

宣華池上月華新。定子當筵

一抹春。但記宮妝成小醉。酒杯不到絕癡人。前蜀

蟋吟鵲囀。自春秋四十花城作浪遊。忽訝征西車馬至。爲誰風雪賜貂裘。

雪香團扇宴摩訶。玉骨清涼

怨綺羅。解道流年暗中換。宮詞翻入洞仙歌。後蜀

內殿傳呼女侍中。紅雲宴散太恩恩。髮香人夢無尋處。腸斷花田一畝宮。

無復雞人候曉窗。青春祕戲

一王降。如何瘦燕肥環外。別有橫陳大體雙。南漢

晉陽玉座紀年新。三品黃驢閒道塵。自有一生惆悵事。雕青天子赤真人。

黃蠟封書夜刺閨。摧殘鐵騎

澤州圍。無因重捉香如意。城下三衣肉袒歸。北漢

草風山雨會春園。比似江南錦洞天。觸迂參軍舊歌曲。齊州九點已如烟。

宮衛銀槍細漏分。夢回猶記

鬱金裙。不愁花謝禪心寂。自有西堂一片雲。楚

開門節度閉門王。一角湖山是故鄉。卻遣夫差水犀手。亂潮如雪下錢唐。

通宵警枕憶眠時。身後風流

絕妙詞。一路花開人緩緩。玉璫絨札寄相思。吳越

金仙一笑夢中來。雙樹誰家傍水開。較可他年三昧宴。玉缸花雨撲春回。隔著荷花路不通。回船惟見水屏風。三郎白馬無消息。隊隊鴛鴦入鏡中。閩。

荆南節度舊名昌。曾是朱三異姓王。卻笑當年李天下。誇人十指太荒唐。一身鶴鷺護煙霞。卜築荆臺小隱家。老眼不堪東北望。秋禽啼殺渚宮花。荆南。

陸杉石儀曹雨中過訪明日作詩寄之竝取觀其詩集

秋堂暮沈沈。樞牖無爽塏。一雨竟三日。雲氣尙靄黳。潤礎占非誣。濯枝勢彌解。屋漏夜逼牀。衾裯重甲鎧。朝來窺瓦花。濛濛綠蓓蕾。我居西城根。頗絕賈嘉洸。拋殘一卷書。桃笙夢黃妳。招尋尺五天。隔絕同九垓。忽聞斂門聲。門外塵如海。騎馬似乘船。但少歌欸乃。入門士龍笑。類獲珠百琲。交非陰雨棄。興若琴星璀。手捉黃塵尾。談詩縱闔捩。狂言驚腐儒。元氣訴真宰。論古殊落落。起予亦每每。我詩溝澮盈。其涸立可待。何當決江河。淵源自深灌。聞君篋衍多。魚箋綴蠅楷。中有詩千篇。芳飈動蘭茝。倅來借一額。庶以慰渴餒。口角或流涎。牙後可拾慧。但求識藩籬。焉敢營壁壘。歸壁終有期。求金幸無罪。不然良賈藏。祕惜無人買。一朝點晴飛。風雨君勿悔。

宋謝文節公橋亭卜硯歌

卜硯集云。硯歟材。修九寸七分。廣五寸六分。額篆橋亭卜卦硯五字。面左右有元集賢學士程文海銘。背有明永樂間閩人趙元識。搢地得硯之由。

團湖坪三寸鏞。建陽市一片石。更無鸛鶴好紋留。應作蟾蜍清淚滴。自從歷劫厓山麓。坑雲五色無人刷。荆棘難尋祕閣頑。泥塗何況橋亭卜。不怨魏行省。但笑留承旨。無勞程集賢。猶有趙處士。始知神物難久埋。南谿七十三間開。得之地下竄狐兔。捧出座上生雲雷。銅爵香姜不足數。玉帶水雲乃其伍。肯草蠲除詔。留伴趙孟頫。願寫生祭文。移贈王炎午。石飛海立五百年。硯兮硯兮爾良苦。憶當流落朝天橋。早識三日無江湖。祇爲趙氏一塊肉。未入楊家七客寮。好事留傳閱兵燹。黑者險廉碧者薺。鼠肝蟲臂已不惜。龍眼犀紋那可辨。重其人者物可悲。一書卻聘生光輝。警鶴徒倚詹尹市。飢鳳太息曹娥碑。嗚呼寶祐初間蕊珠榜。放膽文章慨以慷。三十功名石不言。淒涼資國蜘蛛網。

露坐

彈琴石苔冷。月上青桐梢。清蟬作秋語。宿雨忽已消。蕭景豁至理。況復園林招。中宵此棲息。庶幾謝塵囂。

磨厓碑

南船昔作活谿遊。磨厓碑照活谿流。蓬州書法道州頌。一時二妙工雕鏤。我當厓前拂蒼蘚。徘徊不去消煩憂。別來七載最蕭索。夢中猶掉祁陽舟。傳觀此本大如席。恍遇故物神夷猶。漁陽鼓聲破新曲。閣鈴風雨趨金牛。馬嵬不發出天意。已有父老相遮留。後軍二千護太子。營門雙鯉來修修。河西司馬首勸進。五牋靈武承天庥。靖康之變那可道。汴州錯認疑杭州。始知唐祚二百祀。兵馬一洗西京收。付託得人良有以。遂上尊號古罕儔。中興巍巍發高頌。乾旋坤轉銷戈矛。奈何治定未思亂。先後氣味如薰蕕。天寶車轍

覆不戒。長安某局紛堪愁。喪君有君聊足慰。以暴易暴誰能瘳。飛龍小兒作宰相。豔妻煽之勢未休。摘瓜已聞寢楊飄。升屋幾備齋宮謀。宦官宮妾彼何識。要使骨肉成仇讎。寢門王季望眼絕。高將軍去蠻荒州。不如隴山一鸚鵡。能對使者言安不。深文疑史兩難辨。玉棺猶絡銅絲頭。此書此頌互終古。谿聲山色清而幽。句奇語重竄謨典。字青石赤盤螭虬。但勒豐功紀年月。乃有微旨參春秋。君臣父子處非易。摩挲拓紙心悠悠。

雨後曉起寄杉石

夢起青奴一味拋。酸然衣袂緒風捎。寧回山帶猶垂角。引取杯船欲泛坳。孤約乍聽堂後竹。微吟已破屋邊茅。舊時尺五城南路。細雨柴門手自敲。三日官街聽鼓遲。輾轡惆悵閉門時。秋聲在樹鴉先起。流水當階鴨未知。天意終憐晴亦好。故人相憶鬢成絲。依然幾疊平生厭。正要微紅蠟火吹。

寄稚川時應東巡召試在濟

年年遼海聽西風。況是唐衢哭最工。誰識文章三戰北。忽隨烟霧一竿東。掉頭忍爲鱸魚去。市骨終期駿馬空。不比長門閒賣賦。故人早晚薦揚雄。

姊丈戴松南兆蔚輓詩

落葉不知處。淒然風雨心。書來三日惡。夢去一秋深。思舊山陽笛。招魂海上琴。中年惆悵極。絲竹竟難尋。

暫離猶可惜。永訣更難持。遂有傷心語。應無握手時。側聞蒿里曲。不辦草堂資。後夜山陰雪。扁舟何處維。好在清風里。因君問水濱。俗緣雖爛漫。情話益酸辛。破鏡雙飛夜。佳城一閉春。歸逢女嬃詈。相對亦申申。荷鋤黃公壚。恩恩失酒徒。家藏游俠傳。人畫隱居圖。化鶴歸何日。聽鶯興已孤。詩成因淚寫。不是墨模糊。

臥疾呈慧園先生并謝惠東阿膠

金甌跌蕩排天垠。吹我烏帽沾黃塵。歸家頭風忽大作。始信病也吾非貧。平生埋頭鑽故紙。本以車腳炊勞薪。一朝觸彼風伯怒。漸於牀第衾裯親。心兵驟起伐駭鼓。耳道乍聽摩驚輪。楚子鹽腦夢恍惚。邪哥驗脊陰酸辛。長安居人大不易。一錢羞澀空囊嗔。尋常酒債尙未了。敢爲藥石輸吾緡。交關靜掩息剝啄。心清香妙參前因。故人疎絕今舊雨。肥耶瘠耶越與秦。當時失笑孟公句。今誦其語始有神。昨朝先生蠟雙屐。敏門絮話勞相詢。光風霽月坐亭午。盡散陰翳來陽春。溫言再四有真意。絕勝掌檄當年陳。須臾伴來惠藥物。重之不啻圭璧珉。側聞造此良不易。東阿秋水清且淪。井牀雙甃轆轤轉。修綆上下瓶汲銀。敗鼓之皮不足數。驪駒在路其色純。煎熬不知幾晝夜。用此補攝狂吟身。大夫饋藥士拜受。矧在疇昔從遊頻。未達敢嘗作瞑眩。豈有叔子能酖人。東坡昔愛中散語。養生一論書諸紳。亦知人生各飲啄。靈芝甘醴殊非珍。病間漸覺故態出。狂言撒此姿一巡。詩成投筆旋自悔。奈何無病仍吟呻。頭顱如許太可咲。且復膠口全吾真。

病中從慧翁先生乞僕稍愈遣還因有是作

聞道梅花凍不開。故教桃李作輿臺。王褒僮自能沽酒。賴士奴猶解愛才。他日讀書曾見慣。少日讀書吳下已。有此僕。經時得劍許相陪。分明已乞樵青便。不用膏肓二豎來。

霧落樓遲一病身。初三初四轉情親。不須刺刺顧婢子。且與恩恩作主人。五夜相看惟汝在。一錢難謝諒吾貧。歸家應笑清狂極。幾日無臣卻有臣。

夜坐聞鐘聲偶成

秋鐘不在寺。遠近隨風去。微喧谷口泉。斜破烟中樹。默想參寥禪。茆菴在佳處。空關延月鏡。敗袖落雲絮。一聲息萬緣。龜香妙方炷。清省發中宵。不待荒雞曙。

重光大淵獻

樓居

三間水上樓。樓外一谿流。夾岸春開鏡。全家屋似舟。年年送歸燕。日日見羣鷗。作賦如王粲。幡然得少留。重過松南草堂感懷

春夢蒼然落釣磯。抽簪來款水邊扉。青樽呼月山花笑。黃土停雲宿草肥。邨裏朱陳人兩姓。堂前王謝燕雙飛。年來此地勾留慣。折斷楊枝涕滿衣。

山邱華屋兩漫漫。形影銷磨語未寒。死尙有情能記憶。別猶無病竟摧殘。酒杯不到墳中土。詩卷長留海

上竿試拜維摩。搖翠燭。愁環宛轉忽無端。

魏塘歸舟

春水無深淺。潮來夜夜聲。臨流動歸思。擊楫感平生。風柝和愁入。烟帆挂夢行。漸聞漁櫓集。知近秀州城。
短艇破谿碧。寒林開曉鴉。湖天三面水。春雨一城花。樓閣梳頭影。帆檣估客家。金風亭長去。誰解唱銀槎。
晚出新隄市。東風野色遙。烟深初見岸。水淺不通潮。入港看斜日。逢人問去橈。到家餘幾路。再過一條橋。
青鎮連烏鎮。中間一曲波。江湖三郡接。蘇嘉湖。風雨六朝多。我逐鷗夷去。聊爲漁父歌。天涯飄泊久。奈此綠萍何。

語谿送春曲

青春堂堂啼杜宇。落花無言戰風雨。女陽亭下好烟波。愁殺紅裙采蘭女。采蘭消息春三時。東風無力吹遊絲。碧紗如烟暮雲合。無晴有晴君不知。此時望遠催歸急。雨雨風風春九十。陌上桑青蠶欲飢。烟中樹綠鶯愁溼。吳釵一曲是耶非。子夜瀟瀟白紵衣。畢竟人歸歸未得。翻教風雨送春歸。

夜看瓶中辛夷花有詠

香鎚一穗落銀盤。瓊樹分明夜夜看。乞與軍持散花手。春陰三日水猶寒。
細漏丁冬入夢雲。夕熏初換雨花紛。若爲化作青鏤去。徧寫羅虬九錫文。

掀髯行贈陳序璜明經

憶昔別髻錢唐門。十年楊柳銷人魂。江湖已卷萬馬去。惟有長鬣今猶存。相逢重與掀髯說。舊事淒涼唾壺缺。三條紅燭戰秋風。一握青銅鑄春雪。世間白眼君爲誰。髻也不受東風吹。黃金可成河可塞。素絲盈盈不堪織。紫髻騎馬作將軍。黑髻持節稱使臣。鬢眉自有丈夫氣。身手豈是尋常人。髻聞此語大鼓掌。老夫不作封侯想。吟斷黃花五百年。放還白髮三千丈。離離修竹綠霜坡。抑塞磊落奇才多。李緯真堪尙書耳。却超奈此參軍何。爲髻高歌重太息。于思于思得毋。但當偶爾作詩人。慎勿公然媚側室。

蘭州水烟篇

蘭州水烟天下無。五泉所產尤絕殊。居民業此利三倍。耕烟絕勝耕田夫。有時官禁不能止。賈舶捆載行江湖。鹽官酒胡各有稅。此獨無吏來催租。南人食烟別其品。風味乃出淡巴菰。邇來兼得供賓客。千錢爭買青銅壺。貯以清水及扶寸。有聲隱隱相吸呼。不知嗜者作何味。酸鹹之外雲模糊。吁嗟世人溺所好。甯食無肉此不疎。青霞一口吐深夜。那知屋底炊烟孤。且勿呼龍種瑤草。轉緣南畝勤春鋤。

櫻桃

甘露西涼隔暮雲。江南風味始憐君。不知紅豆相思苦。崖蜜輸來已十分。細寫春愁到玉盤。不須更乞蔗漿寒。夢回憶得紅珠帳。失卻青梅一味酸。

奉蠶曲

小姑飼蠶時。中婦有所思。今日陌上桑。明日機中絲。絲絲不得織。葉葉誰能食。風雨過三眠。雌雄爭一息。

東家蝴蝶飛。西家流鶯啼。甯知閉戶好。及至上山飢。蠶飢尙猶可。蠶死愁殺我。宅婦去何之。縣吏來則那。

明尙書倪文貞公文集題後

嗚呼公今已不朽。安論文章傳與否。忽展公集拜公像。元氣淋漓類我首。當年何人序斯集。華亭門人陳臥子。漳浦友。黃石齋。諸公節概世無雙。況有文辭出儕偶。端人取友洵必端。孟子之言吾乃取。崇禎改元局一變。誅殛奄寺若去莠。內憂旣平外患興。闔獻同生事非苟。因以饑饉不可支。司農發帑空所有。武臣半起草澤中。文者但爭門戶守。宰相五十如奕棋。延儒體仁爾孰某。公時侍從充講官。植望已曾重山斗。詔書忽起大司農。旋贊兵機似天牖。公論東林許狂狷。公彈東廠如雞狗。翩翾自謂鳳可鳴。謠詠那禁焚欲噤。可憐瓦解而土崩。乃復有人掣其肘。無米難爲婦炊巧。有死惟知主恩厚。君死社稷臣死忠。一氣堂堂順以受。碧血三年未肯消。黃塵十丈應誰咎。讀公之文見公志。放筆長歌爲題後。用公卻恨十年遲。傳公幸有千秋久。

雨夜發石門縣四十里至烏鎮見月

黃梅已過雨不休。夜雲溼上詩人頭。烟波淼淼不知處。飛去一葉沙棠舟。叩舷歌嘯三十里。裳衣吹薄風颼颼。行聽篷背雨腳小。仰睇六幕青天收。蟬聲兩岸吟未絕。谿橋野樹相與浮。推篷看水漲夕綠。釣船高出谿中洲。潮痕一丈芳草短。時見螢火隨東流。我家桑門正臨水。沙際一白眠羣鷗。鷺聲到門忽驚起。飛上百尺清涼樓。家人夢醒延我入。青鐙開出雙扉秋。相從吹笛話舊雨。殘月卻挂西南鉤。

讀史一首奉懷慈翁先生竝送出宰青海

班超擊疏勒。陶潛辭栗里。骨相萬戶侯。腰圍五斗米。素志雖不同。亮節無與比。公等誠錄錄。更隱聊爾爾。秦關百二重。黃河走其裏。出綰銅虎符。風雲送山水。甯知拔劍雄。已殊捧檄喜。東山著屐人。但爲蒼生起。送唐符川明經之西甯

楊柳關山月。吹簫遠送行。誰傳新樂府。直到古長城。情話思親戚。離愁數驛程。素書如可託。莫忘雁南征。出門先一笑。西向是長安。桃葉春前渡。符川攜姬同去。梅花雪後看。感君行李意。老我繫匏歎。去貰旗亭酒。休歌行路難。

青鎮石佛寺作

四百八十寺。樓臺烟雨殘。聞香尋古剎。得水供伊蘭。地僻來人少。秋空落木寒。蒼然鐘磬響。踏閣上方看。試問西來意。空堂石氣青。乍逢開口笑。相與點頭聽。面壁苔封字。心齋柿寫經。諸天如讚歎。應補梵王星。山骨何年鑿。山門自此開。長留一片石。小劫六朝灰。貝葉青瑤局。蓮花白玉臺。三生誰作記。不信是飛來。雙谿西去路。烟水澹容舸。不作米顛拜。聊爲蘇晉逃。老僧閒煮茗。晚節近題糕。肯負重來約。寒鴉數點高。石門黃葉邨莊

石磴蕭蕭草漸稀。亞垣環水出雙扉。兩家風雨仍黃葉。一笛樓臺記紫衣。但問主人猶有竹。欲招隱士已無薇。舊時絲管桃花路。曾許春鶯自在飛。

銀牀

花落江南昨日鶯。銀牀無恙卷秋聲。夢纔半夜風吹樹。詩到重陽雨近城。定有蝶飛紅不墜。那堪蟬咽碧無情。呼鐙自寫歐陽賦。童子垂頭蟋蟀鳴。

唐孟蕃秀才寄錫示傲柏梁體百韻石鼓詩題後

當年十碣蒐岐陽。好事遠傳到鳳翔。一自花綱遷艮岳。幾隨鼙鼓破霓裳。樹猶如此堪流涕。石不能言祇斷腸。便欲手摹三百本。青山一髮是陳倉。

橋門觀聽夢三年。無那鄉心託杜鵑。春雪曾歌郢人曲。余昔用韓韻作石鼓歌。夜虹初貫米家船。侍臣誰似相如渴。老子先知阿買賢。會向黃金臺畔去。醉吟古意酒壚邊。孟蕃又寄示燕臺十詠。

說蟹三十韻

十月湖蟹雄。風味出葭葢。谿莊黃竹園。野舸青鐙點。霜落烟濛濛。波開泥黠黠。初聞螳螂拒。既似蚍蜉撼。已爲蠶作筐。漸悔魚入罟。蹣跚獨行橫。紛紜衆聲噴。出淤品自高。貫索視猶眈。釣家攜以供。酒客笑而領。遂授庖丁解。未畏鹽州貶。且生左手持。亦勸食指染。堆盤紅琳琅。侑酒綠瀉潏。華池醺可乞。陽樸薑可慘。噬齊甯未能。笑舌偶不檢。名釋劉熙胥。圖分呂亢覽。豈惟河豚愁。坐使鱸魚減。微腥惜齒芬。大嚼流口漫。雙鉗或朵頤。一斗乃習坎。將軍口腹需。長卿面目慘。伊誰議蚶蠣。直似載鯨鯢。尖團別雌雄。肥瘠驗豐歉。郭索方冥冥。饕餮正嘖嘖。旋驚左股夷。忽遣內黃斂。妍雪淨空霏。拾月蕩瀛溷。擁劍客渡江。挂壁鬼驚陝。

投膠會有期。調羹幸無忝。闔虎公其休。鏤鳳吾豈敢。或封醉鄉侯。仍寵椒房儼。琴聲旣已幽。茶眼相與澹。惱亂公子腸。搜索詩人膽。因續蟹春秋。刻燭韻方險。

觀陳髯所藏馬遠畫紅葉

夜閒落木催鳴鐘。玉塵一拂清樽空。蕭晨讀畫出黃絹。邀我雙耳聽西風。不知青女降何處。霜根欹倒疎玲瓏。迴颺忽作折腰舞。卻憶春柳靈和宮。畫師寄興在秋晚。此態得自無人工。遠寫秋聲補秋色。野烟一角斜陽紅。一僮綠綺抱而侍。一客紅友攜相從。我雖不識客與僮。要非烟火塵凡容。醉眠天暮枕石峰。酒顏霜樹相爲濃。江南黃葉到處有。吾儕徑欲扁舟東。爲君婆娑賦枯樹。卷圖夢冷吳江楓。

踏雪尋梅圖爲陳髯題

四山欲雪天茫茫。不聞流水聞花香。是花是雪不可辨。要使山水寒生光。伊誰獨立無與偶。雪滿衣裳花在手。梅花與雪無處無。此客分明不常有。細觀卻是髯也陳。衝寒一笑蒼顏溫。年來不作閉門態。飄然戲弄空山春。我初識髯髯未白。圖中之髯尙如昔。十年冰雪重題詩。髯與梅花鬪顏色。人生不作趙師雄。美人翠羽來夢中。猶當去作孟浩然。破帽冷壓梅花顛。君不見桃李春風一杯酒。爭似紅衣釣竿手。又不見關山明月萬戶侯。不如鶴鷺逍遙游。卷狂歌回俗態。脫一字。畫師老去金華杜鵑。詩人在。相逢愁外舊山青。萬點梅花打驢背。余有驢子背上圖。

記夢一首并示陳髯

落月直入詩人牀。梅花帳薄不敢當。未愁布被冷如鐵。但覺燦燦寒生光。平生好夢不知數。夢中記夢醒卻忘。羅浮萬樹棲翠羽。邯鄲一枕炊黃粱。雲窗霧閣本無著。況復遮眼春茫茫。會遣雄雞報風月。遠聽膺膊東西廂。亦知人間各有夢。四鄰鼻息如宮商。從君更乞混沌譜。老我安用溫柔鄉。

讀孟郊集

蕭條孟東野。當日少人知。悵望千秋淚。橫陳一卷詩。寒山歸客夢。春雨落花期。作序送君者。惟應韓退之。

聞築軒已渡揚子

秋色河梁上。扁州手共攜。長因送人處。記在語兒谿。聞道來江北。經時到浙西。官梅動詩興。撲與醉如泥。

與友人夜談雲栖之勝

夙與白鷗約。風流水石間。幾年逐塵土。一夕話湖山。那竟尋幽侶。相將出近關。言探修竹徑。肯掉酒船還。

煎茶

茶烟颺清夜。風味澹相親。乍墜牆陰雪。仍收澗底薪。香燈花在霧。古鼎石無塵。卻笑文園渴。當盧但酒人。

寄懷王大松巖

好在南湖月。三年照畫樓。遙知故人岸。相對落花橋。魚尾通流水。船唇叩洞簫。因君訊楊柳。還有舊時條。

題龔半帆之輪出塞錄

白馬長城窟。黃龍古戰場。春風三萬里。吹夢過遼陽。慷慨陳琳檄。艱難陸賈裝。輸他雙海燕。棲向鬱金堂。

山海一燈青。茫茫照客星。請歌前後塞。卻望短長亭。劍氣橫秋老。笳聲倚酒醒。燕支山下路。歷歷寫曾經。

胡石齋丈炯許以先祖檢討公手錄詩本見還作詩呈謝

賜書三萬卷。恨不十年讀。佚宕風塵中。淒然亂心曲。堂堂金閨查。風流渺難續。況復書畫船。飄零出海岳。側聞得楚弓。言許完趙玉。手澤感苗裔。心期仰親屬。短歌不能長。凝睇南雲綠。

石齋丈既見寄先檢討手澤復用拙韻作三詩以示因再如數疊韻爲謝

焚香認封題。未發已思讀。中有代書詩。恩恩達衷曲。何殊陽關疊。卻向離騷續。想當落筆酣。方寸起五岳。矧乃還浦珠。絕勝侑璫玉。前修悵可懷。後死當誰屬。執卷雙滂沱。名山何處綠。祖德既可述。父書敢云讀。何當長者情。肯和巴人曲。根觸三年中。使我腸斷續。曾騎古驪駒。直上魯東岳。九月秋風哀。一身不佩玉。歸來北堂高。慈雲藹相屬。惟應寸草心。長傍金護綠。新詩多古意。不厭百回讀。寄響何蕭條。言懷復委曲。東南鷓鴣飛。情話不可續。夜笛怨向秀。朝絲見潘岳。靈光獨巋然。爾音亦金玉。几杖倘許操。文章應有屬。相期掉酒船。春水明年綠。

雜興六首

讀書愛古人。秋聲出茆屋。雖非卽記憶。猶賢未嘗讀。儒生覓封侯。骨相苦不足。置我圖史間。聊以媚幽獨。長嗟里巷兒。酒食愛徵逐。緘口如金人。行尸而走肉。來者旣難誣。去日恆苦速。韋編可三絕。抑詩亦三復。服田功惟勤。釀酒味在熟。蠶魚作神仙。三食豈枵腹。

右溫經

冥搜韓陵石。豪奪蘭亭繭。觀裘惜片羽。嘗鼎爭一爨。筆硯既精良。几窗復清淺。春蚓而秋蛇。相對微有覲。緬惟雨粟時。創造各有典。方言音已殊。帖體義多舛。鍾王盛行草。古法絕籀篆。詩成張吾軍。八分日趨變。筆諫誠未能。書傭僅可免。一勺墨池波。邈然得所遣。右臨池。

作詩如用兵。虛實極其致。末學誠茫茫。始願恆惴惴。或以一句奇。難測終篇累。或以一時訛。遂襲千古僞。流水必有原。登山每自地。敢云窮則工。漸覺陳可棄。美惡無定形。甘苦有獨嗜。別才吾不憑。佳句儒爲戲。魔入滄浪話。妖載瓠蘆志。爲體紛莫裁。好音竟誰嗣。右論詩。

斷獄推老吏。著書愛奇才。史遷閉蠶室。班固除蘭臺。榮辱恃文字。興替浩塵灰。一人微言絕。四座清談開。指揮塵生風。聚訟蟲成雷。上下三千年。一一咸羅賅。甯知巨眼冷。能使雄心摧。尙論苦無當。竊取誠多材。治亦未可喜。亂亦不足哀。且須食蛤蜊。爽氣西山來。右詠史。

白絹出鵝谿。良工苦描繪。山川起方寸。南北別宗派。局縮一室中。不知區宇大。借茲筆墨靈。畢我昏嫁累。掩卷若舊遊。披圖當良會。展齒折無須。寒具屏宜最。古人成一家。傳否竟難賴。漆鏝殉癡人。錢刀射市僧。讀畫勝作畫。無心任玩愒。譬如親弈棋。置身乃局外。右讀畫。

紅豆隔簾衣。中有綺語硯。含宮復咀商。一顧笑卻扇。春意尙書闌。秋別屯田怨。金船圍烏絲。玉版題黃絹。惜無護花龍。去作銜泥燕。織錦長相思。催砧獨不見。詞壇酒未空。樂府聲傳徧。小道雖可觀。靡音訝忘倦。何當唱江東。浪白天三面。亂撥銅琵琶。鶯珠不成串。右填詞。

象生花

剪綵作花花欲語。女紅疑是司花女。有時蘭葉蝕青蟲。或愛梅花棲翠羽。花能相對葉相當。宛然春色偷東皇。定知有夢迷蝴蝶。不爲無香恨海棠。誰家著劍牽衫早。箇鏡相宜倚花塢。水精簾卷十分妝。翡翠簪斜一枝好。吳儂作事殊等閒。不獨時花棄兩鬟。都將舊曲翻新曲。拋卻眞山看假山。那知相率趨爲僞。金錯錢刀買憔悴。一叢花當十戶賦。幾朵雲收數鄉稅。可憐名字滿頭花。花開花落委泥沙。若爲拈向靈山會。且莫攜來吏部家。彤史拾遺明崇禎時。田貴妃宮婢戴新樣花。他宮無有帝遣中官出採買。越數百里不能得。乃以問妃。妃曰。此象生花也。出嘉興。有吳吏部家人攜來京師。而妾家買之。

憶弊居庭西綠萼梅一株曾作花未寄詩訊之

松關詰曲傍谿開。中有梅花綠似苔。昨夢忽隨流水遠。春愁已向隔年催。卻從此地無端別。還記當時若箇栽。漫道仙人無處所。肯留一月好重來。經年花事渺江湖。牆角東風一笑疏。驛使便教題陸凱。山妻終是怨林逋。燕迷舊壘春來去。鴉暗前邨雪有無。稍喜不輸蒼翠稅。自吹橫笛唱催租。

黃梅花詩

何處初逢綳樣花。曲廊迴合亞欄斜。宮妝一抹能相似。愁殺紅綃與綠華。昨夜金波看月明。今朝山色夕陽晴。紅閨少婦斂梁上。記取黃香是小名。

雪徑風亭底樣寒。懷人千里思漫漫。定知陸凱江南使。封寄梅花是蠟丸。
黃面參禪事可知。拈花太早散花遲。一年一度羅浮夢。又是橫陳嚼蠟時。

曩爲疊韻詩寄胡石翁附陳髻家書中以達遲日石翁書來知前詩已浮海夜航髻有西洋錢一枚
侑函者亦隨僕詩俱去矣今髻還家祀竈乃備錄前詩及札央渠轉致石翁并自題三絕句於後
欲使船家者流竟爲魏公藏拙也臘月二十二日微雪石門縣齋書

青錦香囊手自拏。三朝三暮夜行船。中流定有蛟龍得。詩價分明直一錢。
重題翠鯉未嫌遲。歸及黃羊祀竈時。卻似草堂人日後。今年人見去年詩。
問訊東橋埽北臺。雪花明處墨仍催。者回不是洪橋篋。親見陳琳記室來。

自送詩

自送詩者。舒子課甥石門時作。歲晚客去。舒子最後。無人贈行。遂自爲也。并戲示築軒。

我來如前塵。東郊迎喜神。我去如後勁。東廚醉司命。歲聿云莫。愁一束。我欲不愁愁不欲。況復淹留感時
物。腸斷歸風送遠曲。此時有客盡皆歸。此際有書不能讀。寒犬如豹。青荷荷。鳴雞非蠅。且穀穀。主人似憐
客。無家邀我西堂夜。深宿。豈知風雨杜陵人。想到三閭破扉屋。

曩余侍伯父於京師。聞先君子之變。踉蹌南奔。其明年慈親自嶺外來。浙因先君子旅櫬未歸。遂僦
椽。烏戍余兄弟兩人侍焉。今年兄則從師礪伯弟則課甥石門。家貧親老奔走衣食。歲暮歸舟愴然。

有作并寄呈伯父及兄云

不信涼秋九月時。雲山風樹忍回思。歸憐白鶴飛華表。到及黃羊祀髻司。丙舍難尋三畝老。檀書悔讀十年遲。傷心東郡趨庭日。應遣門生廢杜詩。
慈雲無恙答春和。雙鬢微窺半欲皤。人到還家貧亦好。母皆愛子老尤多。十年絕國梅花瘴。一曲高堂薤草歌。咫尺梧桐鄉裏路。相望不隔禦兒波。
畫師詞客舊神仙。收取聲名四十年。老去馮唐猶執戟。書來陶令想歸田。平泉花木無常主。京洛風塵未了緣。阿賈近來粗識字。每依北斗寫紅箋。
東府寒鐙別子由。未行先問致書郵。登樓草長三更夢。陟屺雲遮萬里愁。一樣依人比我遠。半生知己爲師酬。玉關楊柳青如眼。不見居鄉馬少游。

